

甘肅全省新通志

卷陸拾陸

甘肅新通志卷之六十六志

羣材

人品之不齊各由造就鄉賢既取列入祀者然或立身行事無愧古人則又不得以未入祀少之亦有學問文章勳猷幹濟不無可觀而夷考其行不免駁而不純之譏又或人品亦止尋常而細行之矜見重鄉里善善從長亦在登錄統名曰羣材俟識者論定焉

蘭州府

漢辛武賢狄道人宣帝神爵初爲酒泉太守時先零羌楊玉等反趙充國至金城願罷騎兵留屯田欲俟虜疲劇乃擊之武賢奏言郡兵皆屯備南山北邊空虛勢不可久可益馬食以七月上旬分兵並出張掖酒泉合擊枹罕在鮮水上者天子下其書拜破羌將軍牛邯字儒卿狄道人有勇力才氣雄於邊陲大司空杜林大中

甘肅新通志

卷六十六

人物志 羣材一

一

大夫馬援並薦之以爲護羌校尉與來歙平隴右餘詳涼州府名宦

三國魏成公英金城人初詣太祖太祖見英甚喜以爲軍師封列侯從行出獵有三鹿走過前命英射之三發皆應弦而倒延康黃初之際河西有逆謀詔遣英佐張既平隴右既夜藏精卒三千人爲伏使英督千餘騎挑戰敕使陽退胡果爭奔之因發伏截其後首尾進擊大破之

閻行字彥明後名豔金城人少有健名始爲小將隨韓遂建安初遂與馬騰相攻擊騰子超亦號健將行嘗刺超矛折因以折矛搃超項幾殺之十四年遂使詣太祖太祖厚遇之表拜犍爲太守行因請令其父入宿衛馬超反謀舉遂爲都督行諫遂不欲令與超合太祖聞行意故但誅遂子孫在京師者遂聞行父獨在欲使

並遇害以一其心乃強以少女妻行行不獲已太祖果疑行會遂使行別領西平郡因勒其部曲與遂相攻擊不勝乃將家人東詣太祖太祖表拜列侯

晉郭 冲金城人初扶風王駿鎮關中司馬高平劉寶長史滎陽桓隰諸官屬士大夫共論諸葛亮於是談者多譏亮託身非所勞困蜀民力小謀大不能度德量力冲以爲亮權智英略有踰管晏功業未濟論者惑焉條亮五事隱沒不聞於世者寶等亦不能復難扶風王慨然善冲之言

李 弇字子完狄道人本名良又妻姓梁張駿戲之曰卿名良妻姓梁夫妻相同稱子孫將何以目其舅氏昔耿弇以少年立功吾今賴卿有同於耿氏乃改名曰弇仕至武衛將軍天水太守封安世亭侯其孫暲據有涼土遂爲西涼王

甘肅新通志

卷六十六

人物志 羣材一

一一

辛 攀字懷遠狄道人父鑿晉尚書郎兄鑿曠弟寶迅皆以才識著名秦雍爲之諺曰三龍一門金友玉昆攀年七歲隨父在京師北地程曉攀之親友目攀而笑曰犁牛駢犢孺子之謂攀曰戲及人親非雅訓也賓客大奇異之永安三年爲晉大鴻臚使涼遂留仕軌

邊 熙金城人仕後秦姚興爲兵部郎上陳軍令煩苛宜遵簡約興覽而善之

翟 瑠武始人仕乞伏乾歸爲冠軍氏王楊定率步騎四萬來伐乾歸遣乞伏軻彈乞伏益州詰歸距之定敗益州於平川軻彈詰歸引衆而退瑠奮劍諫曰將軍以維城之重受闔外之寄宜宣力致命輔安國家益州雖敗二軍猶全奈何不思赴救望風奔散何面目以見王乎昔項羽斬卿子胡建戮監軍瑠誠才非古人敢忘

項氏之義乎軻殫乃率騎赴之益州詰歸亦勒衆而進斬定及首虜萬七千級於是盡有隴西巴西之地乾歸以瑄爲吏部尙書後又遣益州與瑄伐吐谷渾視羆至度周川大破之

南北朝宋邊 榮金城人宋荆襄都督沈攸之舉兵 蕭道成以榮爲留府司馬守城張敬兒之襲江陵也城潰見執敬兒曰邊公何爲同人作賊榮曰沈荆州舉義匡社稷不可謂賊身本不求生何須見問敬兒曰死何難命斬之榮歡笑而去榮客泰山程邕之抱持榮顧敬兒曰君入人國不聞仁惠之聲而先戮義士三楚之人甯蹈江漢死耳豈肯與君同日而生敬兒曰求死甚易乃先殺邕之而後及榮軍士皆爲垂涕

魏李 宜狄道人魏武皇帝之長舅也歷官使持節大將軍南北北華州刺史順陽郡公

甘肅新通志

卷六十六

人物志 羣材一

三

李 寶字懷素涼王暠之孫也沈雅有度量驍勇善撫綏伯父歆爲沮渠蒙遜所滅寶徙於姑臧歲餘隨舅廣契北奔伊吾臣於蠕蠕其遺民歸附者稍至二千寶傾身禮接衆皆樂爲用屬世祖遣將討沮渠無諱於敦煌無諱捐城遁走寶自伊吾南歸敦煌遂修繕城府規復先業遣弟懷達奉表歸誠世祖嘉其忠款拜懷達敦煌太守別遣使授寶使持節侍中鎮西大將軍沙州牧敦煌公仍鎮敦煌眞君五年因入朝遂留京師拜外都大官轉鎮南將軍并州刺史還除內都大官高宗初改授鎮北將軍太安五年薨年五十三詔賜命服一襲贈以本官諡曰宣有六子承茂輔佐業冲李 承字伯業寶之長子少有策略初寶欲謀歸款民僚多有異議承時年十三勸寶速定大計於是遂決乃命承隨表入質世祖深相器異禮遇甚優賜爵姑臧侯後遭父憂居喪以孝聞承應傳

先封以自有爵乃讓弟茂時論多之承裕有鑒裁爲時所重高宗末以姑臧侯出爲龍驤將軍滎陽太守爲政嚴明甚著聲稱延興五年卒時年四十五贈使持節大將軍雍州刺史諡曰穆

李 茂承之弟襲父爵鎮西將軍敦煌公後徙定州之中山

李 輔字督眞茂之弟少有人望解褐中書博士遷司徒議曹掾太和初高祖爲咸陽王禧納其女爲妃除鎮遠將軍潁川太守帶長社戍輔綏懷招集甚得邊和六年卒於郡年四十七贈征虜將軍秦州刺史襄武侯諡曰惠

李 佐字季翼輔之弟有文武才幹高祖初兼散騎常侍御命使高麗以奉使稱旨還拜常山太守賜爵眞定子遷懷州刺史賜爵山陽侯尋加安南將軍河內公轉安東將軍相州刺史所在有稱績高祖崩遺敕以佐行荊州事威信大行邊民悅附前後歸之者

甘肅新通志

卷六十六

人物志 羣材一

四

二萬許家尋正刺史世宗初徵兼都官尚書卒年七十一贈征虜將軍秦州刺史諡曰莊子遵襲

李 冲字思順寶少子顯宗末爲中書學生高祖初以例遷祕書中散典禁中文事遷內祕書令南部給事中舊無三長惟立宗主督護所以民多隱冒五十三家方爲一戶冲以三正治民所由來遠於是創三長之制而上之遂立三長公私使之尋轉南部尚書賜爵順陽侯冲爲文明太后所幸賞賜月至數十萬進爵隴西公冲家素清貧於是始爲富室而謙以自牧積而能散衰舊淪屈由之躋敘者亦多矣文明太后崩後高祖居喪待接有加及議禮議律令潤飾辭旨刊定輕重高祖雖自下筆無不訪決焉及改置百司開建五等以冲參定典式封滎陽郡開國侯食邑八百戶尋遷侍中吏部尚書咸陽王師東宮旣建拜太子少傅高祖初依周

禮置夫嬪之列以沖女爲夫人卒年四十九諡曰文穆

辛子馥字元穎平原相穆之子早有孝行累遷平原相父子並爲此郡吏民懷安之元顥入洛子馥不從莊帝反正封三門縣男天平中除太尉府司馬長白山連接三齊瑕邱數州之界多有盜賊子馥授使檢覆因辨山谷要害宜立鎮戎之所又諸州豪右在山鼓鑄奸黨多依之又得密造兵仗上表請罷諸冶朝廷善而從之後卒於清河太守

辛 悠字元壽鄉賢琛之長子早有器業爲侍御史監揚州軍賊平錄勳書時李崇猶爲刺史欲寄人名悠不許崇曰我昔值其父今復逢其子早卒

辛 俊字叔義悠之弟有文才東益州征虜府外兵參軍府主魏子建爲山南行臺以爲郎中有軍國機斷還京於滎陽爲人劫害

甘肅新通志

卷六十六

人物志 羣材一

五

贈征虜將軍東秦州刺史弟術武定末散騎常侍術弟休字季令休弟修字季緒俱有學尚亦早卒時人傷惜之

辛 暢字幼達狄道人大將軍諮議參軍汝南鄉郡二郡太守太和和中本郡中正

辛 雄字世寶暢之子有孝性居父憂哀毀異形殆不可識廉謹雅素不妄交喜怒不形於色清河王懌爲司空辟爲戶曹參軍懌遷司徒仍授戶曹參軍並當繁劇諍訟填委雄用心平直加以嫻明政事經其斷割莫不悅服懌重之詔令門下尚書廷尉議獄雄議曰春秋之義不幸而失甯僭不濫僭則失罪人濫乃害善人詔從雄議於是公能之名甚盛又爲祿養論書奏肅宗納之以雄長於世務更除司空長史詔雄爲行臺左丞與臨淮王彧擊賊平之在軍上疏請明賞罰除輔國將軍尚書右丞遷光祿大夫莊帝除

度支尚書兼侍中關西慰勞使將發請事五條帝從之

辛 纂字伯將雄從父兄初爲兗州安東府主簿與祕書丞同郡李伯尚有舊伯尚與咸陽王禧同逆逃竄投纂事覺坐免官後爲太尉騎兵參軍每爲府主清和王懌所賞及梁將曹義宗攻新野詔纂爲荊州軍司纂善撫將士人多用命賊甚憚之孝莊卽位除兼尚書仍行臺永安二年轉滎陽太守姜洛生康乞得者豪猾偷竊境內患之纂伺捕擒獲梟於郡市百姓忻然永熙三年除河內太守尋兼尚書南道行臺西荊州刺史時蠻酋樊大能應西魏纂攻之不克而敗爲西魏將獨孤信所害贈司徒

李 遵佐之子爽儁有父風歷相州治中轉別駕冀州征北府長史司空司馬卒贈龍驤將軍洛州刺史孝莊初以外戚超贈車騎大將軍儀同三司定州刺史

甘肅新通志

卷六十六

人物志 羣材一

六

李 柬字修賢遵之弟郡辟功曹以父憂去職遂終身不食酒肉因屏居鄉里肅宗初司空任城王澄嘉其操尚以爲參軍事尋轉司徒外兵參軍歷任城濟北二郡太守孝莊初遷鎮遠將軍濟州刺史卒贈安北將軍殿中尚書相州刺史

李神儁柬之弟少以才學知名釋褐奉朝請轉司徒祭酒從事中郎頃之拜驍騎將軍出爲前將軍荊州刺史蕭衍遣將曹敬宗來寇攻圍積時引水灌城神儁循撫兵民戮力固守詔遣都督崔暹等赴援敬宗退走徵拜大司農卿肅宗末除鎮軍將軍行相州事於是葛榮南逼神儁憂懼乃故墜馬傷腳仍停汲郡有詔追還莊帝纂統以神儁外戚之望拜散騎常侍殿中尚書追論固守荊州之功封千乘縣開國侯轉中書監吏部尚書天柱將軍爾朱榮曾補入爲曲陽縣令神儁以階縣不用 大怒神儁懼求解官乃除

衛將軍左光祿大夫尋屬爾朱兆入京乘輿幽執神僊遂逃竄民間出帝初始來歸闕孝靜初行并州事入爲侍中興和二年薨年六十四

辛珍之琛族子少有氣力太尉鎧曹行參軍稍遷中堅將軍司徒錄事參軍廣州大中正丁憂歸尋起爲汝北太守永安中司空諮議參軍通直常侍永熙中襄城太守天平初洛州以南人情駭懼勅爲大使持節慰諭廣洛二州二年除征東將軍行平陽郡事郡民路黑奴起逆攻郡爲黑奴所執諸賊勸殺之黑奴曰成敗未可知何爲先殺太守也乃將珍之自隨待遇以禮右衛將軍郭瓊討平黑奴乃得免興和中爲衛將軍司徒司馬武定三年除驃騎將軍北海太守遷爲儀同開府長史兼光祿少卿未幾詔珍之持節爲廣洛北荆揚雍襄六州慰勞大使招納有稱齊文襄王遺書慰

甘肅新通志

卷六十六

人物志 羣材一

七

勉賜以衣帛尋敕行平州卒於官贈驃騎大將軍洛州刺史諡曰恭子懿武定末開府鎧曹參軍

李 韶字元伯承之長子與弟彥虔蕤並爲高祖賜名延興中補中書學生襲爵姑臧侯除議曹令遷給事黃門侍郎後例降侯爲伯兼大鴻臚卿黃門如故高祖遷都遷太子詹事出爲東安將軍兗州刺史世宗初徵拜侍中尋除撫軍將軍并州刺史以從弟伯尙同元禧之逆雖不知謀猶坐功親免官爵久之起兼將作大匠呂苟兒反於秦州除撫軍將軍西道都督行秦州事與右衛將軍元麗率衆討之事平璽書勞勉復其先爵時隴右新經師旅之後百姓多不安業韶善撫納甚得夷夏之心徵還行定州事尋轉相州刺史將軍如故肅宗初入爲殿中尙書後除吏部尙書出爲冀州刺史清簡愛民甚收名譽遷車騎大將軍賜劍佩貂蟬衣服寢

具韶以年及懸車抗表遜位不許及赴中山冀州父老皆送出西境相聚而泣二州境既連接百姓素聞風德州中大治正光五年四月卒於官年七十二贈車騎大將軍司空公雍州刺史諡曰文恭既葬之後有冀州兵千餘人戍於荊州還經韶墓相率培冢數日方歸其遺愛如此子璵字道璠襲武定中驃騎大將軍東徐州刺史

李璵字道璠韶子也溫雅有識量歷官司徒右長史累遷驃騎大將軍東徐州刺史解州遂稱疾不仕齊受禪進兼前將軍導從於園丘行禮璵意不願榮名兩朝過事卽絕朝請

李瑾字道瑜韶次子美容貌頗有才學清河王懌爲司徒辟參軍轉著作佐郎稍遷通直散騎侍郎與給事黃門侍郎王遵業尙書郎盧觀興領儀注臨淮王彧謂瑾等曰卿等三儁共掌帝儀可

甘肅新通志

卷六十六

人物志 羣材一

八

謂甥舅之國士盧卽瑾之外兄也莊帝初於河陰遇害年四十九贈冠軍將軍齊州刺史弟瓚字道璋少有風尙辟司徒參軍事神龜中卒贈漢陽太守瓚子修年大將軍開府事曹參軍早亡李元珍韶從弟也起身奉朝請太尉錄事將軍卒於步兵校尉李叔仁狄道人驍健有武力以功賜爵獲城鄉男梁豫州刺史王超宗內侵揚州刺史薛眞度遣叔仁大破之以功略遷洛州刺史又除光祿大夫朔州刺史齊州廣川人劉執清河太守邵懷聚衆反詔叔仁討平之除鎮西將軍金紫光祿大夫轉車騎大將軍儀同三司叔仁所用之槩長大異於常槩時人壯之

李蕤字延賓虔之弟歷步兵校尉東都太守司農少卿卒長子詠字義興有幹局起家太學博士稍遷東都太守莊帝初遷濟州刺史轉廣州刺史前廢帝時與第二弟通直散騎常侍義真第七

弟中書侍郎太常少卿義邕同時爲爾朱仲遠所害詠次弟義慎司空屬第四弟義遠國子博士莊帝初並於河陰遇害

李 孚字仲安狄道人恭順篤厚起家鎮北府功曹參軍汝陽汝南中山三郡太守孝莊初以外戚超授撫軍將軍滄州刺史普泰元年卒有五子長子惠昭太傅開府城局參軍昭弟惠謀武定中齊州別駕孚弟敬安奉朝請早亡弟季安粗涉書史解褐彭城王行參軍出爲徐州北海王顯撫軍府長史尋加驍騎將軍孝昌三年卒於軍子處默少清惠起家青州彭城王府主簿稍遷撫州將軍廣州開府長史天平初卒

辛慶之字餘慶狄道人父顯宗馮翊郡守慶之少以文學徵詣洛陽對策第一除祕書郎魏孝莊時楊津啟慶之爲行臺左丞後兼鹽池都將東魏攻陷正平遂欲經略鹽池以慶之有備乃引軍退

甘肅新通志

卷六十六

人物志 羣材一

九

河橋之役慶之獨因鹽池抗拒強敵時稱其勇累官至開府儀同三司位遇雖隆而率性儉素志量寬和有儒者風度爲當時所重又以其經明行修令教授諸生拜祕書監卒於官

齊辛 術字懷哲琛之子爲清和太守政有能名累遷散騎常侍魏武帝六年侯景叛術破之擒蕭淵明遷淮南經略使天保元年侯景徵江西租術渡淮燒其稻數百萬頃還鎮下邳人隨北渡淮者三千餘家又奉文宣敕凡刺史太守鎮將犯法者術皆按奏殺之有犯法者朝廷以其奴婢百口及貲財盡賜術三辭不見許乃送詣所司不復以聞及王僧辯破侯景術招攜安撫城鎮相繼款附於是移鎮廣陵獲傳國璽送鄴尋領太常卿議定律令遷吏部尚書銓衡黜陟咸宜甚爲當時稱譽術清儉寡欲勤於所職臨軍以嚴牧民以惠少愛文史晚更勤學雖在戎旅手不釋卷

周辛 昂字進君慶之族子爲龍州刺史威惠咸著成都風俗舛雜昂登文翁講學舍謂諸生日子孝臣忠師嚴友信立身之要諸生感悟謂父老曰辛君教誡不可違也於是井邑肅然從化遷梓潼郡守時益州多盜昂撫綏荒梗頗得甯靜天和初陸騰討信州蠻詔昂運糧饋之民無怨言巴州萬榮叛圍郡城昂倍道兼行出其不意直趨賊壘賊望風瓦解朝廷嘉其功特進爲驃騎將軍

辛仲景昂族人好學有雅量其高祖欽後趙吏部尚書雍州刺史子孫因家焉父歡魏隴州刺史

辛 威狄道人少慷慨有志略初從賀拔岳征伐有功假輔國將軍都督及周文統岳衆見威奇之引爲帳內封白土縣伯後進爵爲公累遷開府儀同三司賜姓普屯氏出爲鄜州刺史威時望旣重朝廷以桑梓榮之遷河州刺史本州大中正頻領二鎮頗得人

甘肅新通志

卷六十六

人物志 羣材一

十

和周孝閔帝踐祚拜大將軍進爵枹罕郡公宣政元年進位上柱國大象二年進封宿國公復爲少傅薨威性持重有威嚴歷官數十年未嘗有過故得以聲名終兼其家友義五世同居時以此稱之子永達嗣位儀同大將軍

隋李 安字元德狄道人美姿容善騎射周天和中釋褐右侍上士襲爵襄武公俄授儀同少師右上士高祖作相引之左右遷職方中大夫復拜安弟哲爲儀同高祖卽位授安內史侍郎轉尚書左丞黃門侍郎平陳之役以爲楊素司馬仍領行軍總管率蜀兵順流東下時陳人屯白沙安率衆夜襲之大破陳師高祖嘉其功後與哲俱爲柱國卒年五十三諡曰懷子瓊嗣少子孝恭最有名哲後坐事除名配防嶺南道病卒

李禮成字孝諧狄道人涼王暠六世孫年七歲與姑子滎陽鄭顥

隨魏武入關顯母每謂所親曰此兒平生未嘗迴顧當爲重器及長沈毅有行檢不妄通賓客大統中遷太子洗馬時貴公子皆競習武事被服有軍容禮成善騎射而從容儒服不失素望後以軍功拜車騎大將軍時朝廷有所徵發禮成度蠻必爲亂上表固諫周武帝從之又從帝伐齊力戰擊退之拜北徐州刺史未幾徵爲民部中大夫隋高祖受禪進封絳郡公甯州刺史

辛德源字孝基子馥之子沈靜好學美姿容齊僕射楊遵彥尙書辛術並虛襟禮敬同舉薦之中書劉迪又上表薦除員外散騎常侍及齊亡周尉遲迴起以爲中郎亡去隱林廬山著幽居賦以自寄後祕書監牛宏以德源才學顯著奏與著作郎王邵同修國史蜀王秀奏以爲掾轉諮議參軍著書見藝文目錄

辛公義狄道人父季慶青州刺史公義早孤母氏親授書傳周天

甘肅新通志

卷六十六

人物志 羣材一

十一

和中充太學生武帝召入御前令與大儒講論數被嗟異從平齊累遷掌治上士開皇元年除主客侍郎遷并州刺史下車先決斷獄囚嘗宿廳事曰刺史無德令百姓繫於囹圄而能自安乎罪人聞之咸自款服後有訟者多兩讓而止仁壽初充揚州道黜陟大使官寮犯法無所縱舍煬帝除內史侍郎司隸大夫

辛彥之狄道人少孤好學博涉經史周文帝引爲禮曹修定儀注拜中書侍郎封五原郡公宣帝時拜少宗伯及高祖受禪授太常少卿與牛宏撰新禮高祖嘗命與碩儒沈重論議重曰辛君所謂金城湯池無可攻之勢帝大悅拜隨州刺史在州惟貢祭物帝善之曰人安可無學彥之所貢稽古之力也遷潞州卒於官諡曰宣著書見藝文目錄子仲龕官猗氏令有令譽

唐李襲譽字茂實忠節襲志弟也高祖已定長安召授太府少卿伐

王世充拜潞州總管擢江甯巡察大使揚州俗喜商賈不事農襲譽爲引雷陂水築句城塘溉田八百頃以盡地利民多歸本業召爲太府卿居家勤儉厚於宗族祿廩隨多少散之以餘貲購書罷揚州載書數車嘗謂子孫曰吾性不喜財遂至屢乏然負郭有賜田十頃能耕之足以食河內千樹桑事之可以衣江都書力讀可進求宦吾歿後能勤此無資於人矣子元爲桂州都督守桂二十八年政尚清省南荒使之

李孝恭安少子少沈敏有識量高祖以定京師詔拜南山招慰大使邑屬下三十餘州進擊朱粲破之俘其衆諸將曰粲徒食人鷲賊也請坑之孝恭曰不然今列城皆吾寇若獲之則殺詎有降者悉縱之由是騰檄所至輒下明年拜信州總管進前湘道總管統水陸十二軍發夷陵破蕭銑二鎮銑遂降帝悅遷荊州大總管平

甘肅新通志

卷六十六

人物志 羣材一

十一

江南璽書褒之

李懷仁狄道人永徽閒以宗室子弟授朝議郎行癭陶縣令爲政以學校爲先以耕桑爲急能使士民樂業穿窬屏息雖老殘疾惇咸無所憾故境內有貓互相乳麥秀八歧之應

李長系出涼武昭王元盛生而聰明治左氏春秋舉孝廉初任貝州參軍三遷至國子主簿御史中丞盧奕司察甸服辟爲從事天寶十五年大盜覆東周奕死節長遁脫而南會永王璘都督江左諸軍雅知長材將署於幕長告不能無何璘果敗時肅宗在岐朝廷擢良吏以慰郡縣不限官次丞相韋見素表長可用詔攝安州刺史考績旣成眞拜均州治中遷鄧州康允之叛南土大擾長會諸將討不臣尺兵不喪凶黨大壞歷隨曹婺三州徵簿韓王出爲梓州又換明州時越初靜瘡疾未復長務穡勸農人安懷之及

其去也如奪乳育年七十卒

辛京杲鄉賢雲京從弟信安王禕節度朔方京杲與弟旻以策干說禕咨異後從李光弼出井陘督趨邊先驅戰嘉山尤力肅宗異之召見曰黥彭關張之流乎累遷鴻臚卿召爲英武軍使代宗立封庸國公進晉昌郡王後爲工部尚書致仕朱泚盜京師以老病不能從出西向慟而卒贈太子少保旻以從光弼定恆趙後署太原三城使史思明屯相軍及滏陽旻迎擊走之東郡陷退守河陽卒於屯

辛 祕狄道人系出隴西貞元中擢明經第授華原主簿以判入等調長安尉歷遷兵部員外郎再辟禮儀使府憲宗初拜湖州刺史李錡反祕召牙將邱知二夜開城收壯士得數百逆賊大進斬其將進焚營堡錡平賜金紫會河東范希朝出討王承宗召祕爲

甘肅新通志

卷六十六

人物志 羣材一

十三

希朝司馬主留務累遷河南尹進拜昭義軍節度使是時承討恆趙之後潞人彫耗祕至則約出入嗇用度比四年儲錢十七萬緡糧七十萬斛器械堅良隱然復爲完鎮召還道病卒年六十四贈尚書左僕射諡曰肅後更諡懿

渾釋之蘭州人有將才世爲本州都督從朔方軍戰功居多累遷開府儀同三司封寧朔郡王與吐蕃戰歿

渾 鍼鄉賢鎬之弟以蔭補諸衛參軍遷殿中監開成中宰相言鍼嘗治郡有績授壽州刺史終諸衛大將軍

後晉楊承信沙泥人少帝時領蘭州刺史爲政不苛及卒蘭民表乞祠之

金楊 珪臨洮衛人紹王大安元年徐沛界黃河清五百餘里幾年以其事詔中外珪上書曰河性本濁而今反清是水失其性也

正猶天動地靜使當動者靜當靜者動則如之何其爲災異明矣
旦傳曰黃河清聖人出假使聖人生恐不在今日又曰黃河清諸
侯爲天子正當戒懼以消災變而復誇示四方臣所未喻宰相以
爲妖言議誅之慮絕言路卽詔大興府鎖還本管

烏古論長壽臨洮府第五將突門族人本姓包氏襲父永本族都
管泰和伐宋充緋翹軍千戶以功進官二階貞祐初夏人攻會
州與戰於窄土峽先登陷陣詔錄前後功遙授同知隴州防禦事
世襲本族都巡檢三年賜今姓夏人圍臨洮扼渭堡內外不通長
壽馘二人擒一人問得臨洮及夏兵事勢以勞遷宣武將軍復遷
懷遠大將軍升提控輿定元年夏人大入隴西長壽拒戰遷平涼
府治中兼節度副使提控如故二年遷同知臨洮府事分兵伐宋
長壽由鹽川鎮進兵拔宕昌縣進攻西和州奮擊宋兵入保城堅

甘肅新通志

卷六十六

人物志 羣材一

十四

壁不復出長壽乃還凡斬馘八千獲馬二百餘牛羊三萬器械軍
實甚多詔陞總領提控改通遠軍節度使夏人攻定西是時弟世
顯已降夏夏人執至城下長壽不顧奮戰夏兵退加榮祿大夫未
幾夏人復攻會州移兵臨洮長壽伏精兵五千於定西險要間敗
夏兵三萬騎殺千餘人獲馬數百夏人已破西甯乃犯定西長壽
擊卻之斬首三百級旣而復至攻城甚急長壽乘城拒戰矢石如
雨夏兵死者數千被創者衆乃解去是歲卒餘詳大吏傳

元趙阿哥潘鄉賢昌子也事親以孝聞從伐蜀以破大安功最授同
知臨洮府事斬朝天關乘嘉陵江至閬州攻利州生得其劉太尉
宋制置使劉雄飛進攻青居山潘擊之宵潰進逼成都略嘉定平
峨眉太平寨歲壬子世祖以皇帝南征大理道出臨洮命攝元帥
憲宗出蜀以潘爲選鋒攻西安下之賜金符授臨洮府元帥帝駐

釣魚山合州守將王堅夜來斫營潘帥壯士逆戰手殺數十百人堅遂引去中統建元詔還鎮臨洮歲饑發私廩以賑貧乏給農民種粟二千餘石人賴以活又以私馬百匹充驛騎羊千頭代民輸帝聞而嘉之詔酬其值不受後以軍事赴青居山道爲宋兵所邀遂死於敵潘好畜良馬常千蹏歲擇其上驥五駟貢於朝子孫遵之不替帝勅大臣以美諡諡之諡曰桓勇

趙汝楫一名重喜潘子始給侍皇子闕端爲親衛癸丑從世祖征哈刺章數有功中統元年渾都海反從總帥汪良臣引兵至拔沙河納火石地逆戰以功授征行元帥四年從討忽都達吉散竹台等克之使襲父職爲元帥入覲賜金虎符爲臨洮府達魯花赤在郡勸農興學省刑敦教以善治聞請老不許詔其長子官卓斯結襲爲達魯花赤陞汝楫鞏昌二十四處宣慰使卒諡桓襄

甘肅新通志

卷六十六

人物志 羣材一

十五

雍 勳字復先臨洮人大德閒官本府教授學行著聞闢別墅於郡南匾曰雲巢竹居聚書千卷子德純字秉直至大閒以諸生授本縣教諭詔修成宗實錄歸賜甚厚

祁 望西域人居狄道以巨家擢守臨洮偉績著於邊陲卒封本府城隍廟內有碑記

蒲察必達金縣人翰林學士奉命窮星宿海之源後人知星宿海者自必達始

祁 安狄道人賜金虎符臨洮府尹歲久以廉勤見稱超授中大夫同知鞏昌便宜都總帥府事歷陞大司徒

趙汝翼阿哥潘次子官武略將軍兼臨洮府同知弟汝勵授鎮國將軍領兵征討松潘溪茂長河西甯等處有功歷封開國公汝勵子猛哥帖木授甯遠茂雅宣撫使曾孫他石帖木爲樞密副使

趙公臣狄道人授武節將軍松潘開疊威茂軍民安撫使司達魯花赤弟公用官陝西諸道行御史臺御史中丞風裁峻厲聲稱當時卒贈資善大夫公用弟公輔性豪華負才藝河南等省行中書省參知政事有惠政卒贈中奉大夫天水郡公從姪完卜鞏昌等處便宜都總帥公臣四弟德壽雲南諸行中書省左丞

烏馬兒西域人授河南光州達魯花赤威德兼濟任滿光人立去思碑馬祖常撰文後陞授亞中大夫僉通政院事授通議大夫浙江湖州府總管

明趙琦字仲玉狄道人名脫帖木兒人呼爲趙脫兒元授榮祿大夫陝西中書省平章事守臨洮洪武初兵入秦關琦迎師於境遂率衆歸附授臨洮衛指揮僉事兼同知臨洮府事授宣武將軍三年隨大將軍徐達於臨洮之白塔子峪口生獲僞國公按但不花

甘肅新通志

卷六十六

人物志 羣材一

十六

及省院官三十餘人招撫岷州鐵城等十八族又隨湯和取察罕腦兒授廣威將軍本衛世襲指揮僉事仍守臨洮十九年同耿炳文巡西甯創衛治次年隨郭英北征二十四年移肅州二十六年坐事死時年五十三

朱隆河州人洪武初克復江南郡縣未嘗妄戮一人兩征朔方累有殊勳七年陞宏農衛世襲指揮

劉正狄道人洪武中由明經官大同衛知事歷大理寺左評事正屢世同居以一人最長者爲家長歲擇子弟分任家事門內肅然鄉里化之正與其弟忠相爲師友忠亦官大理寺右評事時號二劉卒年七十一贈中議大夫

劉忠字之葵正之弟幼以孝聞補郡弟子員旋以蔭授太學生官南京大理評事錄囚廣東以平允聲聞中外將轉陞偶與僚

議邊務不合遂力求致仕歸性儉約不營產業所得祿賜皆散之親故人謂有父風云

朱 芾隆之子代父官洮州衛指揮調岷州征撫疊州等處番境有功陞河南指揮同知永樂元年守備甯夏十一年調征烏思藏等處開拓邊境撫育番部陞指揮使卒於任

李 弼字士佐狄道人由鴻臚序班遷知淇縣歷工部員外知楚雄南康二府忠厚質直有善政歸囊蕭然

張 羽臨洮衛指揮永樂初仁宗在藩邸納其季女爲妃後征徽州婺源等處有功由百戶歷鳳翔千戶淮安指揮以朝秦王於陝西病卒子溥北斗奴早亡猶子翔襲臨洮衛指揮

張 英靖虜衛人官浙江平陽縣丞折獄平允邑俗婚姻多論財時有質成者英以禮諭服俗亦遂革

甘肅新通志

卷六十六

人物志 羣材一

十七

王 聰靖虜衛人官四川成都府訓導端方嚴毅學行兼優誨士子咸依先正則範及考績陞本府學正子龍山另有傳

高 顯靖虜衛人山西澤州訓導負性鯁直不屑隨俗俯仰與州牧弗宜甫三月卽告歸

張 安狄道人宣德戊午舉人官灌縣訓導嘗三與鄉試同考試官士林以爲榮有著作藏於家

勒志敏或作士敏狄道人宣德中官館陶縣丞歷曹縣主簿慈惠臨民民多愛之官滿遂籍於曹

周 輔其先汝甯西平人始祖勝元末歸附授職卒次子慶優襲正統五年調臨洮衛都指揮同知卒子文革襲卒子禎再襲無後禎弟祥襲傳子應麟孫廉曾孫克忠俱世襲輔係克忠嫡長子萬曆二十年襲傳子覲明

趙英字廷傑狄道人景泰初由臨洮衛指揮使陞陝西都司指揮僉事協守涼州於鎮番抹山斬獲羌首千餘級封右軍都督府同知充涼州總兵

岳宗狄道人舉景泰四年鄉試官江油知縣清廉慈惠民愛而畏之歸里後爲學宮置祭田二百餘畝宦餘俸資悉均諸兄弟之子

顧忠字允誠蘭州人孝友篤志內外無閒才性敏達好學不倦中景泰丙子舉人官博野訓導爲人和厚謙謹歸老處兄姊益厚服食殯葬曾不少吝云

趙維禎字世祥狄道人天順壬午舉人成化閒官仁和知縣以廉能稱

王英字士傑狄道人成化丙午舉人官四川射洪縣知縣丰姿

甘肅新通志

卷六十六

人物志 羣材一

十八

古雅以文章政事鳴於時

趙鉉字宗器狄道人年十八隨父守涼州因游涼庠成化時守臣薦於朝命世襲指揮督洮岷八衛兵守備涼州北虜入寇鉉與遇於朵浪口斬獲甚衆尋移河湟復以游擊鎮永昌行邊至金川鋪虜千騎突出鉉力戰破之後虜入韋州剽掠鉉擊敗之得其牛羊器械以歸又夜二鼓報虜五百掠牛羊北去鉉徐肅隊仗黎明追及之虜衆潰殺傷奪獲不可勝計自是虜不敢南牧先是值凶歲遇饑莩者鉉爲之設室廬給衣食全活甚多麾下貧卒將鬻妻以補官馬鉉惻然爲之代償道經沔池有因人命賣其子以逭官刑者鉉輸金還其子其好義類如此年五十五卒

劉青狄道人指揮使積之孫後調鎮番指揮遂家焉裔孫叔堂中 國朝乾隆丙辰進士

李甯靖虜衛人宏治乙卯舉人官直隸鹽城知縣時有冒詐錦衣官者來縣甯不應錦衣反拜之甯曰彼先來拜必詐少頃復遣家僕來饋贄甯佯禮之詰僕而得其情遂擒詐職者實之法時稱明察後以持正不得郡守歡調四川彰明縣卽家居不出

曹寶狄道人歷官景州知州剛方無阿有治績

王暉狄道人官甯鄉主簿以廉能陞壽州判官其事蹟載平陽志

劉桂林字廷美源之子宏治中由貢生令湯陰以慈祥廉介聞俄以疾致仕

魏文政字養民狄道人宏治戊午鄉舉由遼陽教授陞泰興知縣時邑多流亡文政力除一切鱗集差徭及需索諸弊歲減民科費數萬金復業者萬餘戶

甘肅新通志

卷六十六

人物志 羣材一

十九

房鎬靖虜衛人敦禮尚義博古好學執喪悉遵文公家禮與金城彭幸庵友善常以書寄慰稱爲知禮子恢孫鳳時皆能世其家學

房愷都指揮懷之弟篤志力學三登乙榜士多就學焉時當事者延處西席不欲往以子弟就塾受學乃納之及游太學以才學見重於大司成官河南鄧州同知清介勵俗歸家惟載圖書數事而已

王龍山字景瞻靖虜衛人宏治甲子舉人學博思敏尤長於詞賦官浙江平湖縣知縣抵任三日案驗吏書舞文者實之法一邑稱快後解組歸著書見藝文目錄

高登字東山靖遠人官山西屯留主簿多惠政人不敢干以私遭母憂歸邑人泣送有士懷清慎民慕愷悌之頌繼銓四川大竹

舊賦納松潘登建議詳上官儲綿州郡邑皆被節省以父耄歸養
值歲饑出貲周濟隣里戚黨咸受其惠

高 冠登子初知浮山縣潔已愛民因註誤降判解州議築城垣
民蒙其利署夏縣值大荒條議賑粥事宜民賴全活又立慈幼局
收撫棄嬰後因事左遷遂家居著述

周自新臨洮衛人以郡學生襲百戶職通經史勤政恤民兢兢有
弗職之懼時衛所五屯分隸各百戶舊多厲民自養自新集僚友
曰吾儕有此皆國恩也奪公自利重負朝廷矣况殘民以逞乎遂
以法自繩秋毫無所妄取自是衛政肅清屯民咸蒙其庥官至參
將歸二十餘年賦詩鼓琴以自娛

李 棟字子才靖虜衛人世襲指揮僉事將官欲侵軍糧以百金
遺棟棟不受屢立戰功擢指揮同知有暮夜餽金者亦峻卻之後

甘肅新通志

卷六十六

人物志 羣材一

二十一

官平川守備

趙 濟字世望狄道人聰明秀發弱冠入庠既襲蔭爲本衛指揮
使歲旱嘗輸粟助邊又嘗捐製 文廟祭器武宗時守備洮州改
岷州收復鎮角等堡民人爲立生祠後以疾乞歸優游山水詠歌
自適著書見藝文目錄後卒子梁襲

石 璠字世望狄道人忠節同知甯之子以郡庠生襲祖職正德
七年勦流賊於老馬山有功尋移涼莊嘉靖元年改陞本衛軍政
掌印八年洮岷番侵臨洮璠從都督劉文敗之十八年歲饑發私
粟賑貧乏嘗捐修 文廟啟聖祠泮池及公署兼製祭器累陞懷
遠將軍子巖襲職由僉事陞同知嘉靖三十年以戰功陞本衛軍
政掌印

趙 梁字隆之濟之子父守備岷州梁從岷山劉伯正授春秋末

弱冠爲郡弟子員嘉靖時襲臨洮指揮歲饑出粟三百餘石先給兩庠士子蘭州中護衛屬藩封久難治當道以梁往申嚴條約更新府庫勢豪不敢作梗御史朱槐亭疏其才力陞西固城守備吐番帖服尋移甯夏廣武時多邊警梁誓將練兵諭以忠義每出必身先士卒虜不敢近塞後以疾乞休卒於家

焦 正靖虜衛人嘉靖時官山西浮山縣知縣前判四川綿州不事苞苴不徇請託子濟山西黎城縣主簿陞四川永川縣縣丞轉池州府經歷居官幹練守正不阿

張天敘靖虜衛人官山東臨清州提舉司正革冒役釐侵漁部司嘉其剛介兩蒙優獎解組歸邑人撰惠德篇以贈子儒宗

李成蛟字陞龍渭源人由吏員官四川龍安照磨時龍安久不發科成蛟請之知府伍某遷學 廟於府治南後人文蔚起登科第

甘肅新通志

卷六十六

人物志 羣材一

一二十一

者相繼不絕番夷侵掠圍郡城將帥戰不利成蛟請於兵備道謝某提兵三千且戰且撫直驅蠻於三百里之小河堡解圍而歸大吏薦授雲南水司丞

劉 誼字正卿臨洮衛人博學能文善書法由太學生官平陸令清慎勤敏發奸摘伏不避權貴尋以憂歸服闋補費縣令賢聲益著平徭賦勸農桑置官莊設義倉鑿惠并以親老乞歸

任 瑀渭源人官四川南部知縣剛方厚重跬步不苟以道義自繩後學咸仰爲儒宗子某河南嵩縣主簿瑀壽至期頤人以爲仁厚之報

李 連字商需狄道令勗之元孫由舉人嘉靖時官奉天監督同知廉惠清慎多善政後以直節忤當道罷歸躬耕高石崖樂道自娛以終其身

薛鳳靖虜衛人官四川南江教諭前訓導陽曲不冠不見諸生多士有薛夫子之稱繼任洪洞調南江諸生敬之亦如陽曲焉王大有靖虜衛人四川江津縣丞篤志好學淹貫經史以文飾治與時不宜家居時年七十餘猶在紅山寺與諸生孫炳然等講論不輟

趙本字立之狄道人苦學無閒寒暑由嘉靖癸卯舉人知施秉縣後調任武清民懷其廉卒於官

魏寶字固齋狄道人嘉靖閒明經學問博洽諳曉聲律所著詩清新古峭爲洮士所宗給事張萬紀出其門著書見藝文目錄

趙昆字承裕梁之子嘉靖丙辰襲衛使兼理屯局額外稅賦一切報罷尋乞休居南山別墅適意山水年六十卒

袁珍字玉卿狄道人英敏好學爲詩多警句時流鮮及著書見

甘肅新通志

卷六十六

人物志 羣材一

一二十一

藝文目錄

劉漸字進夫金縣人爲陳留教諭性直才敏嚴考課啓迪有方
賙恤貧士會學 廟傾圯請於當道捐俸修之兩署縣篆吏民畏
懷

張九疇字天錫狄道人器宇宏偉登第後還家以註誤除籍杜門
不出左經右史從學者甚衆著書見藝文目錄

趙永在字延德狄道昆之子神宗甲戌襲本衛指揮有強寇攔路
劫掠永在單騎捕獲首惡馬康睦等二十八人庚寅火酋犯境永
在嚴兵固守捍禦之功居多

楊濬莊浪人甘肅總兵官萬曆二十一年青杷都兒駐牧昌甯
湖漸據龍首山大爲邊患濬出擊之斬首六百餘級青杷都兒單
騎遁

潘光祖字義繩狄道人天啟五年進士歷官吏戶二部山西參議道性清介執法不撓巡按某託令曲庇所知光祖不從巡按銜之會流賊入境光祖親冒矢石督軍拒戰賊皆敗走巡按以招降之誤劾其縱賊逮問光祖自以無罪恥對獄吏仰藥而死晉民悲之立祠以祀

楊行恕字本忠狄道人丰標俊逸意量恢宏尤善交遊每與人一見輒歡若平生無不以肝膽相許者讀書過目成誦工詩賦登天啟壬戌進士選翰林院庶吉士卒於官年三十一著書見藝文目錄

劉約字子博狄道人國子生甯州訓導陞山西潞城教諭歷涇州學正甯夏教授轉慶府紀善所至有稱

劉師寵字見素聰穎深造崇禎中由歲貢教授岷州建魁閣修泮

甘肅新通志

卷六十六

人物志 羣材一

二十三

池士大夫咸欽仰之

王 皚字二雪靖虜衛人崇禎己卯舉人再上春官不第時值闖逆變亂皚夙負經濟練達時務謁大學士王建泰留談竟日具有條理即奏聞欽賜進士給劄付數十張任其便宜討賊未就而卒姚之瑄字德佩狄道人崇禎壬午舉人天資誠懇臨文敏妙爲士類所推後署同官教諭卒於官子清博學多才以歲貢官紫陽訓導

國朝張 鼎蘭州人舊爲明肅藩校尉流賊陷蘭州負肅王從水竄出潛行至呵咻噶被執送西安王死賊嘉其義釋歸順治時充蘭營裨將從征孫可望於湖廣師旋而卒其孫元瑞由武舉官至湖南鎮標游擊

王同春字合陽蘭州人工書能騎射順治五年由拔貢司李寶應

捐俸修 文廟立義學置膏火田暇輒集胥役教之射會海賊逼
寶應率吏民拒守賊畏其射不敢近救兵至解去擢淮安府同知
築隄防沃河民號爲王公隄後遷貴州遵義知府以事去官卒同
春嘗刻所書斗大千文於寶應學宮有心遠堂法帖行世
謝天錦字漢襄蘭州人與三原孫枝蔚狄道張晉兄弟相友善爲
詩雅鍊雄俊不落凡近著書見藝文目錄

謝 歷蘭州人與鄉賢蕭光漢同學光漢精易理歷精洪範五行
佐大將軍岳鍾琪戎幕占賊事多奇中由歲貢生議敘同知未仕
卒

王 綬字佩可同春之子康熙三十二年舉人授渭南縣教諭擢
山西平遙縣知縣勤政愛民民生祠之遷遼州知州亦有遺愛卒
後貧不能歸遂葬焉著書見藝文目錄子效通由監生官刑部郎

甘肅新通志

卷六十六

人物志 羣材一

一二十四

中爲果親王記事能詩精小學工篆隸有陰隲文印譜行世
牟我贈蘭州人兩當學訓導我貺府谷縣訓導均由歲貢授我貯
沔縣訓導由拔貢生授兄弟三人並有文名我贈尤精易理事母
極孝好善樂施子實有實大俱歲貢生工文著書見藝文目錄實
大傳父易學能預知年歲豐歉我貺子實頎拔貢生亦司訓府谷
與從弟歲貢生實秀並以文章世其家我貯曾孫洪砥行力學嘉
慶六年舉於鄉

李 炳皋蘭人拔貢生官江蘇金匱縣知縣日策蹇行田野間見
禾稼茂密則呼田主溫語獎勵或勞以酒食荒穢者立予笞責居
無何發小麥數百石令民磨麪兼徵其麩未幾又發麩令民作醢
民不識其用意所在甚患苦之初炳因縣饒瘠思興水利周覽闔
境山川見湖水可溉田而隔於大山謀穴山引水民以爲難炳不

顧促令別阡陌治溝洫及下流歸宿之處食石工以所磨麪用炭火鍛石沃醯其上而開鑿之且戒曰聞水聲卽來告已而水聲淙淙命舁大礮置穴口對之轟擊穴穿水湧溝澮皆盈化瘠土爲腴壤遂爲金匱永利考滿遷順天北路同知去民生祠奉祀

梁濟漣字靜峯皋蘭人幼聞段堅之學禮義自將口無擇言乾隆六年鄉舉第一十年成進士選翰林院庶吉士改授刑部主事累遷雲南司郎中在部二十年檢稽疑獄多所平反後以目疾歸里主講蘭山書院錄朱子白鹿洞學規刊卧碑立文仁堂中弟子多遵循者蘭州知府王文治嘗手書士仰昌黎同北斗人方永叔是洪河十四字贈之時謂其當之無愧云

江得符字右章皋蘭人父霽武舉官彝陵游擊母李氏賢而知書訓得符及其姊韻學故得符姊弟皆能詩乾隆二十五年舉於鄉

甘肅新通志

卷六十六

人物志 羣材一

一二十五

授華陰縣訓導課士之暇日事吟哦兩登華頂皆有記人頗傳誦家素裕嘗以田一區屋數椽推其從兄之賢而貧者後卒於任所貧不能反葬諸生醵貲送之歸著書見藝文目錄

齊文淮字龕谷皋蘭人少孤家貧事母至孝年十八始從師讀書性敏慧日記千言乾隆十八年以拔貢舉於鄉赴禮部試卒於洛陽旅舍同里王建送其櫬歸子艮生傳其父學以優貢官北城兵馬司吏目

江爲式字幼則得符族兄乾隆十五年舉人酷嗜吟詠詩與得符齊名稱皋蘭二江旣官邠州學正以詩寄得符云共知手筆無高下卻笑頭銜亦弟兄聞者絕倒著書見藝文目錄

黃建中字西圃皋蘭人乾隆二十五年舉人一試禮部不第遂閉戶著書不復作春明遊蘭州旣改縣有陳如稷州志而無縣志乃

創爲之桑園峽有烈婦投崖死夜聞哭聲因作記立碑祭之聲遂寂建中雅負文名嘗戲仿長洲尤侗西廂制義成數十首才情幾與相埒著書見藝文目錄如稷康熙閒歲貢著蘭州志四卷
劉鷓舉字翹九皋蘭人歲貢生性孝友嗜讀書尤精青烏岐黃術掌修社學時有藉端侵奪社租者鷓舉力持之社得無廢
張朝楨字克生皋蘭人精小學說文凡金石文字無不識教學里塾學規嚴謹弟子皆肅然選授陝西延長縣訓導卒於官朝楨掌修學社事增廛肆至二十楹其後張繹武邵榮清等遂有興文社之舉繹武有文名舉乾隆三十九年鄉試第一
劉迺皋字蘭峯皋蘭人歲貢生嗜學工文遇事敢言爲廩生時有童生冒籍應試者迺皋力持不可大吏數緩頰不爲屈卒斥去後官長安縣訓導監關中書院力除積弊時人服其嚴正

甘肅新通志

卷六十六

人物志 羣材一

一二十六

王光晟字柏崖綬之孫寄籍山西遼州充貢生後復旋里善八分書喜吟詠與狄道詩人吳鎮相切劘爲詩一氣呵成中無雜句後官江甯典史其送客詩篇錢塘袁枚見而異之曰不意衙官中乃有此人著書見藝文目錄

陸振奇皋蘭庠生安貧樂道無願外意書法最有名同時謝上仁常文經俱歲貢生善擘窠大字爲人皆方正

王 梁字蘭舫皋蘭人拔貢生官洵陽縣教諭授經諸生口講指畫終日無倦容歸里後以禮義爲教樂從者衆

吳華字實之歲貢生范維琮字西村庠生俱皋蘭人設帳授徒華履行方正嘗夜行里中聞呼盧聲叩門喚其人出切戒之其人悔泣一時博者斂迹皆曰畏吳先生來也維琮重然諾取與不苟人無敢以非禮干者

李逢春字芳辰皋蘭人家貧入伍以功補陝甘督標千總事母孝得少甘旨卽趨歸奉親乾隆中從征金川賊碉據山險我軍仰攻不利逢春率敢死士數十人從山西小徑攀藤蔓直上突出賊後賊駭亂立奪其碉遷守備撒拉回犯蘭州據華林山寺逢春斷賊汲道賊大窘官軍由木城攻入盡殲之嗣討鹽茶叛回有功進秩游擊嘉慶初從征川陝教匪戰益力嘗以數百兵猝遇賊二萬乃倚山列柵激厲士卒誓以死戰衆皆感奮莫不一當百礮矢無虛發賊大驚引去擢副將聞母訃以金革方殷不得奔喪哀痛成疾乞休歸逢春善撫士所將皆四川兵歸之日軍士空營出送至有垂泣者後二十年四川兵征喀什噶爾過蘭州尤相率至其廬修禮焉

秦維峻皋蘭鄉賢維嶽弟乾隆五十三年舉人知山西陽城縣有

甘肅新通志

卷六十六

人物志 羣材一

一二十七

惠政

張文衡字東皋俞衡文字平臺俱皋蘭人均工制義文衡清矯拔俗衡文根柢經史文衡於及門之才而貧者卻其贊助之筆墨衡文幼時以孝行稱宗族間文衡乾隆五十四年鄉舉第二官迪化州學正著書見藝文目錄衡文乾隆五十九年鄉舉第三官山東知縣左遷湖北蘄水縣丞

巫景咸皋蘭人乾隆五十七年舉人官醴泉縣教諭勤學勵品淹貫羣籍於經濟尤切講求長子揆嘉慶二十二年進士官鳳翔府教授性靜穆不喜外務次子淳道光十二年舉人官隴西教諭品行修潔

姜得仁字居寬皋蘭人乾隆五十九年武舉補陝甘督標千總嘉慶二年從征川陝教匪夜戰江口峽失足墜水旣出復登山決鬪

手刃數十人賊披靡積功至陝西撫標游擊道光六年張格爾寇回疆大臣某率京軍過陝西促造箭八萬限期五日巡撫徐炘難之得仁進曰此易耳飛檄各營造箭先有箭者借用之甫四日得八萬箭炘異其才未及薦擢而卒得仁性孝友好學蘭州士子鄉會試至關中者多主其家晚置祭田以其餘給族中貧者婚喪之費其妻陳氏撫孤姪數人與己子等聞者賢之

王 泰字筠圃皋蘭人起家行伍乾隆閒殲撒拉逆回蘇四十三誅石峯堡叛回張文慶平臺灣奸民林爽文等皆力戰有功嘉慶初從征川陝教匪俘首逆王三槐又討平建昌雷波涼山生番官至四川綏定協副將泰練達軍事持己廉潔時論賢之

薛大烈字丕承皋蘭人少入伍官督標千總從征臺灣廓爾喀積功至都司嘉慶初從征川陝教匪大小數百戰殺賊無算生擒首

甘肅新通志

卷六十六

人物志 羣材一

一二十八

逆多名歷擢至四川川北鎮總兵九年晉直隸提督調陝西江南廣東以事左遷陝西漢中鎮總兵調河北鎮卒於官奉 旨照提督例 賜卹予葬祭及建牌銀 賜諡襄恪大烈好讀古兵書精於選練故所至有功著書見藝文目錄弟丕烈由武舉官至鎮番游擊子福蔭千總遷四川會鹽營守備

許學詩字興可皋蘭庠生品格端方嫻於吟詠著書見藝文目錄楊殿甲皋蘭人嘉慶三年武舉時川陝教匪作亂隨南贛總兵慶溥追賊紫陽縣屬之六道河界嶺王黑壩轉戰二日斬二百餘級又追賊孟石嶺連戰三晝夜殺賊數百前後三十餘戰積首功二千餘級累官西安城守營參將

徐惠增字謙承皋蘭人敏而嗜學爲詩文甚新雋嘉慶三年以優貢登鄉試副榜與弟晉相友愛老而彌篤及門弟子成就甚多晉

原名懋增亦能文學乾隆五十一年鄉試官郿縣教諭郿人咸欽其學行惠增子檀品行方潔登道光六年進士掌教蘭山書院諸生文擇其尤者錄諸版名擢英錄後以知縣謁選卒於都懋增子棠 恩貢生

史廷勇皋蘭人性樸忠從軍川陝每戰身先陷陣面目被創屹不少退嘗猝遇賊衆奮勇相搏墜深澗中攀藤蘿復上縱橫決鬪賊疑有神助駭而遁後出師河南克滑縣城又勦西甯塞外野番並有功累官俄博營游擊

張作功皋蘭人生有材勇與兄作友入伍同隸陝甘督標幼時其父挈二子一姪避撒拉之難遇賊哀之曰願舍二子易一姪命賊義而俱釋之嘉慶初川陝楚教匪稔亂作功兄弟從征俱力戰有功後征河南滑縣教匪西甯野番回疆張格爾兄弟並在行間皆

甘肅新通志

卷六十六

人物志 羣材一

二十九

奮勇先登作友舉嘉慶六年武鄉試軍功累擢參將駐防新疆緣事降調起爲西甯鎮標游擊卒作功累官重慶鎮總兵道光十八年貴州仁懷縣妖人謝法真假託降神捏造天書聚衆作亂雲貴總督伊里布率作功等勦之謝逆恃險負隅其黨穆繼賢袁明倫在地道中放槍礮屢傷官兵作功偕雲南提督余步雲總兵阿精阿等囊土擔柴挾火攻器具四面協攻竭一晝夜之力殺賊二百餘人焚其巢斃逆黨無數復分路搜捕殺獲千名首逆謝法真等俱就擒伏誅凱旋敘功 賞花翎後五年卒於官

王崇儒字伯雅皋蘭人能詩文兼善書畫回酋張格爾之亂總督楊遇春率師西征崇儒上書陳方略遂參戎幕事平授福建平海縣丞調和平從討臺灣土匪張丙有功擢知縣署長樂縣事尋選湖南益陽知縣加知州銜陞乾州直隸廳同知任平海時歲大侵

罄廉俸賑濟富紳感動皆竭力相助民無流亡仙遊縣有疑獄奉檄往勘得實平反之而卻其賂金益陽俗好架詞構訟謂之打油火崇儒痛懲之其風頓革又斥絕益陽縣試富室賄取案首積弊桃花江有滑油峒地深阻羣盜據爲窟穴崇儒率幹役躬往掩捕盜出不意悉就擒在益陽七年政聲懋著及將赴乾州士民扶老攜幼相送且曰未知青天能再來否多有泣下者

音得正字柳莊皋蘭人庠生平易近人不立崖岸縣行鄉飲酒禮舉得正介竇書法用力最深初習顏真卿後摹趙孟頫故婉媚之中饒有筋骨一時榜聯多出其手

魏尊德字馨吾皋蘭人嘉慶癸酉舉人大挑知縣分發直隸歷署南河唐山高陽等縣補懷安縣值歲大饑請開倉減價出糶均賦稅清保甲勸農桑息爭訟凡有益於民者悉次第行之後攝通州

甘肅新通志

卷六十六

人物志 羣材一

三十

牧及大城令西路同知卒於直隸子二長克敦道光庚子舉人安徽候補直隸州歷署太平宿州各州縣以憂歸後官山西保德州知州次克承四川候補知州署洪雅江油鹽源等縣循聲卓著同治四年回籍回亂殉難另有傳

張錦芳字文圃皋蘭人嘉慶十二年鄉舉第一歷任清水縣訓導華州學正平涼縣教諭陞涼州府教授學規嚴肅諸生有行止失檢者輒訓勵不少貸然未嘗以喜怒擯棄一士故所至人皆敬而愛之家居倡修青城書院而爲之主講成就後學甚多子良弼增生能琴工吟詠著書見藝文目錄

孫圓智字若愚皋蘭人歲貢生初學百家言汜濫於釋老者有年繼知其謬妄乃以聖賢爲歸主敬存誠一意躬行對妻子亦無惰容夙工書法一筆不肯苟後選授秦安縣訓導卒於任

馬 璞字含貞皋蘭人嘉慶十三年舉人官邵陽縣訓導少時質甚鈍而好學不倦晚年有得於易且精奇門遁甲法嘗布石子作諸葛忠武侯八陣圖納蠅其中盤旋不得出導至生門始飛去厯驗不爽

陳兆鵬皋蘭人拔貢生持躬端謹不以冥冥墮行居西關近市每聞官宰清道聲必肅衣冠起立或謂官不及見兆鵬曰吾以行吾敬而已子筠積學能文由拔貢生舉嘉慶十八年鄉試

王一鳳字鳴山皋蘭人起家行伍嘉慶中從陝甘總督那彥成征河南教匪焚道口破司寨敗桃源賊克滑縣城一鳳功居多陝西三才峽箱賊起從固原提督楊遇春移師往勦擒逆目譚貴等盡平賊衆道光初西甯察罕諾們罕煽野番作亂犯窩卜圖卡復從總督那彥成擊定之六年逆賊張格爾陷回疆四城隨揚威將軍

甘肅新通志

卷六十六

人物志 羣材一

三十一

長齡西討連破賊於洋阿巴特沙布都爾阿瓦巴特洋達瑪河渾河復克喀什噶爾及英吉沙爾葉爾羌和闐等城累功擢授昭通雄威鎮總兵遷貴州提督二十五年雲南永昌府屬回匪作亂一鳳與雲南提督張必祿分領練兵兩路進勦殺數千人斃匪首馬大追至小松寨又大敗之餘匪竄回猛庭乘夜潛逃四散一鳳親赴其寨撫安舊居回民百餘口而還敘功 賞侍衛調福建陸路提督署閩浙總督甫月卒於任奉 旨馳驛歸葬一鳳居官廉歿後囊橐蕭然

張振濯字仲纓皋蘭人嘉慶十八年舉人品端行潔學有根柢從之游者率成名以去選授陝西盤屋縣教諭卒於官振濯精岐黃術著書見藝文目錄子六佑侃俱庠生佶拔貢生最知名能傳其家學官武威縣教諭

唐 連字汝器皋蘭人品格端方年二十喪偶終身不復娶縣行鄉飲酒禮舉耆賓工琴善篆刻書畫尤超妙絕倫嘗客游武昌居鹽法道秦維嶽幕國子監祭酒法式善倩其作詩龕圖且寄之以詩著書見藝文目錄

王式鈺字二如皋蘭人道光元年舉人官迪化州學正學行端謹書法摹米芾得其神似先是嘉慶間呂熙敬李溥並以善米書有聞於時至是式鈺繼之熙敬字肅堂歲貢生溥字匯川工部員外郎致中叔父

周悅勝字懋功皋蘭人由行伍出征川陝教匪積功至守備河南賊李文成據滑縣悅勝適在都自請從軍克城先登遷游擊道光六年逆酋張格爾糾布魯特安集延入寇從揚威將軍長齡往討戰洋阿巴特及渾河等處並有功加參將張格爾既平監修英吉

甘肅新通志

卷六十六

人物志 羣材一

三十一

沙爾城十年安集延復寇喀什噶爾悅勝率兵馳援賊解圍走陞四川綏定協副將署喀什噶爾總兵督修喀城旋授涼州鎮總兵移鎮大同未至擢直隸提督調甘肅英夷入寇仍調直隸防天津海口事平 賞乾清門侍衛復調甘肅時西番不靖悅勝率師深入勦平之加太子太保卒 賜諡壯敏後因番賊出掠削前典其族弟佐勝亦由行伍從征川陝擒首逆張士雲龔貴等累擢梨園營都司勦西甯番賊積戰功官至川北鎮總兵

朱克敏字時軒皋蘭人道光八年優貢咸豐中官大通縣訓導性通脫無城府然絕口不談人短亦不論時政得失有語及者輒以他辭亂之能詩喜畫楷書摹顏魯公家廟碑八分書摹唐碑並以蒼勁勝行草跌宕恣肆自成一派弟克敬亦能詩工書畫尤秀麗山水雖小幅妙得遠神官湖南龍山縣典史有廉惠聲以目疾去

官貧無以歸士民爲置產業遂籍焉著書見藝文目錄
竇 德字耀功皋蘭人道光九年授肅州總兵善撫下後調鎮新
疆人慕其德立生祠祀之

姚寶善字楚卿皋蘭人庠生明於醫術尤精易理嘗謂順理者數
雖凶亦吉逆理者數雖吉亦凶嗜明儒學案及李中孚反身錄與
及門論說亦以二書爲準子啟烈能傳父學後殉回難

段文耀字星洲皋蘭歲貢生學問淵博尤善元承旨趙孟頫書及
門列膠庠者甚衆子聯芳亦能書精於易學品行修潔以廩貢生
署禮縣訓導卒

劉 模字子範皋蘭人歲貢生雅擅文名道光十一年應陝西鄉
試闈中已擬元旣而失之性嚴正教授生徒學規整肅一時執經
請業之士多萃其門

甘肅新通志

卷六十六

人物志 羣材一

三十三

趙守貞字幹卿皋蘭人庠生知音韻善象緯素習堪輿家言好王
陽明李二曲之學同里廖某傳天主教辨斥之弗遺餘力聞而感
悟者頗多

李鍾麟字仁甫皋蘭人庠生勤於學問嗜宋儒性理書意有所得
輒日記而手鈔之醫卜星相奇門俱妙青烏術尤精著書見藝文
目錄

張 炳字文庵皋蘭人道光十五年進士官安徽天長知縣性謹
厚博學工詩賦駢儷文尤奇麗無匹年八十餘卒遺稿散失

張維典字惇五皋蘭人道光十五年舉人學品俱優著敬惜字紙
戒殺牛犬綱取禽兔諸說以勸世選中衛教諭未聞卒

楊紹玠字介夫皋蘭人增生居家孝友善古文喜吟詠其詠周烈
女一歌頗有關於風化載藝文

陳育仁字健堂皋蘭人由吏員官陝西汧陽縣典史廉靜寡欲不苟取與門役買物或增價欺冒則如數與之曰我但禁其婪索民財耳盜我財何傷汧陽張某講性理學育仁從之遊頗有所得庠生王懷玉字玉如邃於易與育仁以性理書相切劘著書俱見藝文目錄

張士奇字慎庵皋蘭人由吏員授廣西永福縣丞遷那地州判卒於官篋中只布衣數領而已同僚歎其清慎釀金相賻妻子始得扶櫬歸

李恩慶皋蘭人道光戊子歲貢同治間回亂爲賊所俘憐而釋之教授數十年生徒前後數百人成就甚衆性謙謹待人必以禮人多樂從之

李紹晟字少谿皋蘭人道光二十三年舉人咸豐元年舉孝廉方

甘肅新通志

卷六十六

人物志 羣材一

三十四

正文行兼優工醫術善琴精象緯學仿渾天儀式製小球圖星辰其上承以木架而運轉之雅與躔度相合後選平涼縣教諭未赴任卒族子篤宗字子厚光緒八年舉人署漳縣訓導亦善琴學純正重躬行嘗取論語弟子入則孝章析爲條目擇十三經中語最淺顯者分註其下以訓童蒙見藝文目錄

顏鴻都字漢卿皋蘭庠生書宗山谷畫摹右丞琴學尤深邃所譜一絃琴周子愛蓮說諸操頗稱於時著書見藝文目錄子華春咸豐五年舉人亦善琴

張景泰字階平皋蘭人幼嗜學弱冠省其從兄映奎於襄城學署見朱子全書慨然曰此孔門正脈也手錄成帙以歸語人曰天地萬物綱常倫理性命精微盡在此書學者先從小學近思錄著力然後可徐圖上達耳於是潛心密詣終身不懈易簣時自撮生平

行事題魂帛中而卒

盧 政字敏齋皋蘭人咸豐二年舉人性至孝父歿廬墓三年同治二年選授通渭縣訓導時回匪變亂援甘大軍往來如織政奉檄催辦軍糧公勤清慎保加五品銜遷涼州府教授致仕歸掌教五泉書院年七十一卒政爲學宗陳白沙王陽明李二曲旁涉天文青烏岐黃家言著書見藝文目錄

周士俊字子英皋蘭人咸豐三年進士由內閣中書改授廣東長樂知縣署高明縣事縣分上中下三坊其上中坊先因土著與客民械鬪村市十焚八九鬪猶不息士俊立捕首惡寘之法餘震懾不敢復動其下坊地勢低窪多水患灾民遷避時匪徒乘機搶掠士俊爲設巡船護視之在官三年政最調署番禺縣爲省會首區華洋雜處詞訟理曲者輒賂洋人求直士俊持法不阿適有爭地

甘肅新通志

卷六十六

人物志 羣材一

三十五

案曲者方就繫總督某命釋之且言此洋人所囑士俊不肯杖之令荷校於市總督怒撤任同治三年署知羅定州擒土匪戴永英置之法復隨提督馮子材剿滅王狂七盡破其巢敘功以同知直隸州用五年調署嘉應州旋補授時髮逆餘孽據州城官軍新克復士俊奉檄以五千金賑難民躬歷鄉村實惠及民後署香山縣繼又署揭陽整頓戶糧清丈均墾積歲轆轤爲之一清十三年復嘉應州任釐定培風東山兩書院章程振興文教擢潮州府知府未抵任卒士俊爲政百務具舉而其力抗洋夷尤爲世所稱云

張照南字午亭皋蘭人咸豐三年進士授戶部主事累遷河南司郎中在部幾三十年勤於其職生平績學能文性情和藹嘗主講五泉書院循循善誘成就後學甚衆

張 淑字慎庵皋蘭 恩貢生性嚴正里中子弟敬憚之重建皋

蘭書院釐剔興文社積弊淑之力居多咸豐時團練議興淑獨請城中團而不練時躉其言同治初河狄逆回叛省城戒嚴當事已募練勇三營助守議者欲請再募一營淑謂練勇新饟取之房租近復設局普捐民力已屬難支若再議增饟從何出况應募多游手無籍緩急未必得力且有易聚難散之憂衆議乃止淑授徒四十年成就甚衆而遇事有識類如此

馬世燾字魯平皋蘭回籍咸豐五年舉人績學能文操行不苟主講皋蘭書院勤於訓迪及門成就甚多會病卒御史吳可讀輓以聯云老輩無多歎大雅泯焉絳帳於今誰繼武解人有幾恨知音渺矣青樽何處復論文可以想見其生平矣

魯尊孔字卓堂皋蘭人咸豐八年舉人明象緯學善詩古文詞官階州學正地震被陷卒著書見藝文目錄

甘肅新通志

卷六十六

人物志 羣材一

三二十六

俞如衡字平湖皋蘭人庠生性端謹文思敏捷爲童子師循循善誘每值學使案臨其門下必有遊庠者咸豐八年赴陝西鄉試卒於旅舍同時俞繩武字沙溪歲貢生傳其祖衡文之學勤於訓誨及門成就亦衆衡文另有傳

高 策皋蘭庠生世居南鄉高家灣爲本村義塾師教規嚴肅義塾有學田二十畝歲獲糧數石策分其餘以濟塾童之困乏者里人服之

王三祝字道馨皋蘭人庠生以軍功保六品頂戴生平博聞強記尤長於醫求診者日踵門不絕居家崇禮喪事不用浮屠族人化之著書見藝文目錄姪濟川庠生敦本尚行老猶好學

顏文絢字素堂皋蘭歲貢生性孝友膽略過人咸豐閒髮逆亂東南協甘歲饟不至上官設局勸捐委文絢董其事歷保教職知縣

加知州銜同治元年撒拉回不靖署總督沈兆霖討之軍於平戎驛文綯時官碾伯縣訓導奉檄與員外郎吳可讀游擊陳應春等分道進剿賊懼乞降撫定而還三年前徽縣知縣趙必達募川勇款五年三月督標兵因饑變布政使林之望撫定之而無糧給發兼城門晝閉餓殍載道人相食文綯多方勸導不終日得倉斗小麥一千石並收撫逼城陝回馬士彥等人多德之

郝有金字品三皋蘭人由吏員官廣東雲落徑巡檢咸豐間率勇剿普甯陳許二賊及潮揭惠來匪黨解西北兩江圍積功擢揭陽知縣逆首陳金剛竄踞兩廣湖南邊界有金轉戰賀縣懷集開遠封川閒與官兵夾擊殲其醜類升署德慶州補羅定知州西甯城克復保知府封川鳳樓湫遺孽復熾馳擊平之有金所至以武功

甘肅新通志

卷六十六

人物志 羣材一

三十七

顯而勸農桑興學校貸貧民以貲不責償有循吏風

陳應春字遇時皋蘭人以武生從征西甯野番河南捻匪撒拉爾回匪積功至延綏鎮標游擊署蘭州城守營參將保副將善於撫馭頗得士卒心先是兵糧由縣倉支給屢因缺支向縣署譁譟應春皆彈壓使散同治四年改歸糧臺支發運道梗糧不時至兵枵腹守陴日有死者五年三月兵遂譁變時應春解任閒住布政使林之望檄至署詢撫輯之策應春謂倡亂不過一二十人餘皆因飢附和若將倉中所贖殘麩及庫中餘錢悉數分給必合就撫並請飭紳士速行籌捐兼借商民布疋運赴河口和糶以資接濟之望從之委使曉諭衆兵皆聽命登陴比倡亂者勾陝賊馬士彥及河狄賊至已無隙可乘明年八月河狄賊復犯省城難民數千避城下守者不納應春請諸大吏啟關悉入之復奉委送總督關防

赴涇州大營回至車道嶺誤陷廢窖中卒

曹 熙字績堂皋蘭人廩貢生官陝西安定縣知縣調蒲城厯署長安渭南咸甯事其宰蒲城也嚴治刀匪撫安善良清釐逋賦以政最擢知直隸保安州巡撫王慶雲奏仍留陝莅長安時髮逆擾及山西平陽省城戒嚴回紳馬百齡練回勇五百助守未幾漢民與回勇夜鬪百齡執二人至縣熙令送還百齡自治而其門已閉乃暫收管詰朝回勇晨操畢揚旗執械趨縣署劫囚時熙方櫛沐披髮而出遇諸宜門手擒兩勇即以其頭相擊餘勇皆奔散擒八人比撫標三營兵至事已平巡撫欲重懲之熙謂此由鬪毆起衅以鬪毆了之可耳案結漢回皆悅服莅咸甯時渭南縣民爲鹽課聚衆萬餘據渭北上漲鎮熙奉檄渡渭彈壓衆聞熙來爭棄械跪迎熙曉以利害遂解散同治元年關中逆回亂勝保督辦軍務屢

甘肅新通志

卷六十六

人物志 羣材一

三十八

戰皆敗退入省城賊焚東關不敢出回氛益大熾時熙已擢知商州荊州將軍多隆阿追髮捻竄寇亦至商南巡撫英榮使道員唐李杜潛赴武關求救多隆阿奉 旨將率師南旋以無稟揭不能奏請難之熙乃資遣士民之避難商州者齎稟及犒軍禮以往多隆阿奏 聞詔許赴陝勦回既入關糧乏熙饋運適至遂連戰破賊蕩平倉頭羌白王閣村蘇家溝諸逆巢熙與有力焉四年甯夏將軍穆圖善招撫靈州馬化澂檄熙任其事保知府旋丁母憂服闋赴陝署興安知府後署商州知州假歸卒

曹 炯字鏡侯熙之弟道光二十年進士選庶吉士授編修改內閣中書協辦侍讀出爲南河裏河外南山盱同知遷道員署淮陽兵備道以母老乞歸厯主關中豐登蘭山三書院講席陝甘之士半列門牆甘肅分闡創建貢院贊助之力亦多

劉鑑涵字鏡海皋蘭人廩貢生少孤事母孝母歿喪葬盡禮不作佛事待二弟亦友愛喜作書每晨以油布十餘幅泥書大楷數百
歷署平番縣訓導涇州學正年七十無疾而卒

陳 泰字翰山皋蘭人副貢生父兆奎工醫善琴事孀母孝自譜有思母三歎等操回疆之役以勞績保府經歷縣丞歸部選用著書見藝文目錄泰能詩工書善易晚年服膺先儒之說刊宋程理中性理字訓明楊椒山家訓以誨世

張繼志字續亭皋蘭人廩生安貧守約不妄求人通音韻嘗約三十六字母爲十八母學主躬行讀說命至知之匪艱行之惟艱慨然曰恆之尤艱

范 銘字新齋皋蘭忠節汝英從子幼嫻技勇入伍隸陝甘督標從征江南髮逆積功至哈拉庫圖營守備同治元年撒拉番不靖

甘肅新通志

卷六十六

人物志 羣材一

三十九

從總督沈兆霖擊降之晉都司署涇州營篆時陝回倡亂竄及涇之高峯寺銘率所部馳剿殺賊數百復破之於涇河川圪塔關黨原等處在涇半年築土城並高峯寺礮臺以備賊二年慶陽知府和英與逆回穆三等戰於古城堡敗死銘坐削職三年陝西提督雷正綰西征銘爲前驅疊克堡鎮復平涼城有功開復原官雷正綰攻張家川賊巢銘先登擢參將四年赴鞏昌防剿會岷州叛回戕官陷城銘率隊直往破賊復岷州城五年收復黑頭民勇編爲營剿平荔川教匪晉副將洮州廳久陷賊明年三月抵洮州遂復洮城大破賊降舊洮營逆目丁永安及股匪數萬七年正月署總督穆圖善規復狄河以所部攻克渭源之官堡狄道之大小南川殺賊數千與諸軍會克狄道城擢總兵加提督銜復同弟鎔以千餘兵大破狄道敗匪及河州悍賊五六萬於洮河西岸賊懼乞降

師旋復叛穆圖善再督諸軍勦之八月銘率所部潛襲录麻賊築堡據爲老穴銘夜至新城堡距录麻二十里擒賊偵殺千餘人乘勝克景古城及五虎灘朱家山草灘莊頭廟馬家集諸逆巢進擊胭脂三川高家集破賊卡六十餘座復埽平黑山頭賊卡二十四座殺賊二千餘遂會諸軍克太子寺廳城還駐岷州九年屯秀石關酒店子木寨嶺等處河州賊竄至迎擊斬獲甚多生擒賊目阿渾議布納等賊遁歸銘屯南關坪後因裁營節饟饜不發軍中斷炊七日衆變銘不能制奉 旨革職查辦總督左宗棠惜其才命帶振威二營立功贖罪銘招降耿得勝土匪三千人小烽臺堡降回蠢動擊定之奏還原職旋以提督記名簡放並 賞給三代一品封典左宗棠征新疆銘帶恪靖白馬營駐防巴里坤二載凱旋歸農十餘年卒

甘肅新通志

卷六十六

人物志 羣材一

四十

岳瑞雲字現五先世河南湯陰人武穆二十餘代孫明時徙皋蘭東鄉岳家巷道世務農無顯者自瑞雲發憤讀書有志未就值同治初河回猖獗邑人宴安無慮瑞雲與其兄庠生起鵬擇古邊牆險地傾囊買之濬濠引水環築外垣儼一石峯遂肖其形曰鼇峯寨五年流賊麕至東鄉堡寨均被焚破惟此寨獨存避難者悉納之保全性命甚衆瑞雲從未矜伐有道及者則曰天險可守人和足恃予何力之有焉年六十二卒子三長廣颺附貢生餘力農孫十二曾孫四

許爾熾字昌卿皋蘭人 恩貢生性介而和訓學有方朔望必衣冠宣講 聖諭及先正格言以故成就多材晚年不求仕達建晚蓋樓多樹松竹與諸門人論古賦詩酌酒彈琴時或優游隴畝與父老子弟談農事同治閒河湟不靖爾熾督辦團防鄉里多攸賴

焉

張國常字敦五皋蘭人由同治癸酉拔貢舉於鄉光緒丁丑成進士授刑部主事以父延洪年高求終養遂不復仕方同治六年回匪撲省城賊徧皋蘭山下殺聲不絕國常時家拱蘭門外聞變急走父所趣入城倉皇間賊已及門以身衛父奮勇擊賊賊飛石中頭額流血不止日晡賊退奉父趨郭門門閉棲古寺中游騎數數來幾不免黎明門啟乃得入八年丁母憂父以兵荒交迫議薄殮國常椎胸泣潛質所有乃得如禮殯主蘭山書院講席廿餘年成就甚多父歿蔬食三年未嘗入內堂兄國錦老而貧二子早逝遺孫幼歲時分以薪米歷久不衰及卒身任喪葬攜之歸親爲教養十六年學使胡景桂疏薦加員外郎銜二十一年四月河湟回變省城戒嚴總督楊昌濬委辦城防練勇五百登陴邏守因上書

甘肅新通志

卷六十六

人物志 羣材一

四十一

極陳撫不可恃宜全力勦河州駐重兵以固根本又言回性反覆宜趁此兵力遷八坊大東鄉米喇溝諸回及循化撒拉於關外羅布淖爾一帶狄河難民集省垣者宜擇地安插以免疫癘時省中漢回雜處訛言四起幾釀變國常召老成數人開誠布公曉以利害遂安堵如故二十二年五月海城回戕縣官劫獄囚屠戮平民所過村市皆墟總督陶模欲令提督董福祥移師固原討之密書詢可否國常因力陳大軍宜專意枹罕不可舍重就輕狀又以書抵福祥極論當時情形福祥均如所策行事平當事欲上其功固辭乃已卒年七十二著書見藝文目錄

劉錫勇字子仁紅水堡人同治三年回亂四年五月十五日逆首楊文智攻陷堡城錫勇退守楊家寨約衆鑄鉅礮作長矛爲戰守具復煎熬礮硝濟軍用歷有勤勞

劉正名字義山皋蘭人同治癸酉舉人苦志勤學潛心先儒性理諸書身體力行爲閭里表率前署靈州學正壽七十卒

滕尙誠字至如皋蘭人光緒丙戌進士官安徽定遠縣知縣以清操自矢凡有裨地方者必實力奉行嘗曰當官不能以清慎勤自勸卽上負國下負民矣後以抗直與上官不相能竟解組歸卒勸劉映藜紅水庠生有智略同治四年賊首楊文智陷紅水據裴家營馬升彥踞鎮虜堡閻自洪占擺壩川白彥虎連營鎮武岔極其兇殘六年七月羣逆東竄流氛劫奪映藜設謀禦寇籌畫兵餉有功於時

夏 剛金縣人乾隆甲寅武舉嘉慶三年從征四川等處臨陣九十五次生擒著名賊首王三槐以功授大通營千總剛才技優長馭兵有術歷署甯夏後營守備屢護本營都司弟強官督標左營

甘肅新通志

卷六十六

人物志 羣材一

四十二

把總

黃國珍字珠浦金縣人嘉慶閒貢生能文負氣節主講增秀書院憐才訓士汲汲如不足性好山水結廬南山之麓與王言如徐質夫諸人相唱和著書見藝文目錄

張師斌字圖南金縣人幼時問其父曰讀書何爲父曰光前裕後斌曰仁義禮智非學業乎父奇之教以讀書過目成誦十歲能文入庠後務實學淡名利精易數通醫術歷任邑宰 善政宜民著

書見藝文目錄

金殿元字健庵金縣人道光初由吏員從軍新疆以功保升照磨銓江西樟樹鎮鎮商賈雜沓娼妓博徒麇集於此以故衙署內外陋規均藉此爲挹注殿元抵任力禁絕之尋辭官囊澀甚邑人感泣斂金助貲遂得歸

金永清字海洲金縣人同治二年以國子監生隨軍剿河洮叛回有功賞五品軍功敘把總三年冬奉甘肅提督陶茂林東解安定靖遠等園擢守備賞戴花翎是年冬總督楊岳斌檄赴金縣安定一帶防堵六年西氛甚熾時文麟爲哈密辦事大臣景濂副之景濂奏調永清由省節勦而西進規哈密次甘州適賊犯郡立解城圍擢都司七年春次安西攻克三道溝黃闡灣賊屯晉游擊是年秋冬轉戰安西王門敦煌間八年春至哈密攻西山二堡回巢克之超升副將奉旨賞給毅勇巴圖魯名號統帶靖邊振武威義馬步各營西征歷復木壘河奇臺古城子等城十一年冬補陝西磚坪營都司景濂奏留仍統帶各營權古城游擊十二年秋陝回白彥虎西竄圍哈密分擾沙山子等處往援賊遁加總兵銜十三年六月白彥虎糾集大股回匪撲犯濟木薩永清帶隊截擊

甘肅新通志

卷六十六

人物志 羣材一

四十二

獲勝以總兵記名簡放光緒二三年間克復烏魯木齊昌吉呼圖壁瑪納斯各城得旨以提督記名簡放四年以母憂歸後赴磚坪都司任十五年轉廣武游擊二十四年春以修墓乞歸冬卒於家子二選官四川縣丞造官總兵

滕兆魁金縣人入行伍從將軍多隆阿征髮逆身先士卒克復廬州以功保游擊後卒於軍給世襲恩騎尉

岳奠川字靖溪金縣人幼取父所習弓矢日演之父遂授以命中法同治三年辦本邑團練有功賞六品頂戴六年從哈密大臣景濂出關七年克復玉門三道溝等處賞藍翎千總八年春攻克哈密西山二堡賊巢晉花翎守備十二年秋征白彥虎解城圍晉都司十三年六月力戰白彥虎於濟木薩保升游擊加參將銜旋以親老歸里卒於家

王吉平字鏡堂金縣人貢生同治間回亂與拔貢高鈺奮勇督團築城防守衆賴保全光緒初禁種罌粟吉平奉行尤力皋蘭知縣陶模給予奉公守法匾額

李 蓀字桂海狄道人順治乙酉舉人官蘄水知縣蘄俗多逋租前令率未二三載輒罷去蓀曰此土田未清故也因履畝勘丈絕其兼併自是蘄無催科之累人爲立祠頌德

李 馨字蘭若狄道人順治乙酉拔貢官京山縣丞會邑令奉使他郡馨署篆痛革一切積弊除火耗之半僅完正賦令歸賺其軋己潛賄司李劾於撫軍撫軍廉其實切責令由是無一敢短馨者後又署景陵時景陵以征輸逃亡逋糧數萬馨知爲富豪欺隱及胥書詭灑盡心搜剔積逋咸清懲革害民巨蠹百三十七人究追故官之叛僕三十餘人頌聲大作前官劉毓賓陶襄坐逋糧羈候

甘肅新通志

卷六十六

人物志 羣材一

四十四

馨皆設法代完令還里翰林譚某贈詩曰居然境內成三異不見囊中有一錢蓋實錄云

石秉乾字建伯狄道人副總兵崇德子順治辛卯武舉康熙三年臨洮府仍復屯衛委官開墾屯田招耕輸納秉乾署管本衛屯糧事三年之間四鄉五所開墾屯田一千餘頃招人民八百餘戶

張 晉字康侯狄道人順治辛卯舉人明年成進士博學能詩與三原孫枝蔚蓉江戚藩相友善初授刑部觀政明年出宰丹徒詢疾苦勸農桑興學校裁火耗罷諸不急之務三年惠洽民孚辛酉充鄉試同考官得丹徒張王書卽所縣試童子第一人者也會主司以賄敗晉亦註誤死時年三十一死後虧帑千三百兩士民悼惜乃於城隅設匭投施甚夥雖婦女亦多脫簪珥助之不數日木匭皆盈人以是知晉之廉而有去思也晉嘗於獄中集杜作琵琶

十七變抑揚頓挫感動人心著書見藝文目錄

張謙字牧公拔貢生晉之弟年十四有詩成帙爲孫枝蔚所賞初至兄署卽以能詩聞時紳士以謙年少未之信也會春日諸名士邀飲板橋請爲詩謙卽口占二絕眾乃服著書見藝文目錄
晏御賜字心貺博學多才著書見藝文目錄

劉昌孕字振先狄道人順治時歲貢好讀書與郡隱逸王厯元相善乙卯流賊入境聞其名延坐問計終不屈賊亦不忍害丙辰銓醴泉教諭卒於途

孫淑字永善狄道人幼從學王厯元卽矢志道學舉明經器度冲和不事峻厲雖多所箴規初不忤物由是人皆服其平易而樂從其繩墨年八十三卒子券齡貢生

孫宜纘字述之狄道人少喜爲詩康熙初閩南詩人許琕以安定

甘肅新通志

卷六十六

人物志 羣材一

四十五

令罷官僑狄道宜纘日與之游詩益進後以歲貢司訓秦安遷固原學正尋請休卒於家

王汝明字穆如狄道人少穎悟性嗜古康熙癸卯舉人每上官朝使往來狄道者必諮訪焉有著作藏於家後遺不傳同時石中琳字雲章聰敏著名康熙乙酉舉人官翰林院典簿

張學詩字敬齊狄道人康熙間由行伍爲臨洮城守游擊素習邊事民夷悅服時尚武功郡中子弟不以講學爲意學詩設立義塾勤於誘導多所成就學詩久厯行間遇軍情必身親調度後擢衛輝參將未赴以疾卒郡中吏民爲立碑頌德

宋虎山狄道人由行伍爲西甯鎮標千總吳逆變隨奮威將軍王進寶克復臨鞏軍功最著後征勦雲南以力戰署永順參將旋陞永順協副將厯授楚雄鎮總兵

劉惠聲字君實生員姚清字汝白俱狄道人惠聲詩文與張謙齊名清博學多才學使每器重之後以歲貢官紫陽訓導卒
王金榜字雁題狄道人嘗教授龍泉寺從游者百餘人年八十卒子綬字佩弦邑庠生文思尤敏一日可成數十藝先金榜卒綬門下生徒尤衆

楊古英字時俊狄道人 恩貢生好讀書年八十餘猶手自鈔錄不輟及卒門人發其篋蠅頭小楷約數萬卷

董 錦字燦素狄道人康熙壬子武舉己卯吳逆猖狂錦杖策謁靖逆侯張勇題補撫標千總後洛門天水寇賊竊發錦隨副將岳昇龍出征敘功陞都司管河州守備時撒拉回夷不靖錦單騎往諭夷遂輯睦遷西甯都司總督佛倫題補巴暖三川營游擊巴暖舊有水利未興錦激勵居民開渠灌田任五載以父老乞歸養

甘肅新通志

卷六十六

人物志 羣材一

四十六

張 玉字珏軒狄道人嫻騎射康熙十九年夏包子反玉從興安總兵張憲載征奮勇爭先有功厯官至四川建昌游擊越雋夷加巴貫子等肆掠玉統兵會剿斬獲甚多擢遵義副將逾年署重慶鎮事雍正元年諸番悖逆玉由黃勝關出口直抵熟當夜出奇兵克復東車兩堡旋駐歸德二年進征卓子山冒矢石連破三寨隨總統川陝漢土官兵招撫寫爾素錢朵諸番皆不血刃而降六年黃螂逆蠻德昌煽動苗民玉生擒之招安餘黨事平授川北鎮總兵九年以老乞休歸

潘敏建字象乾狄道人康熙時貢生肆力風雅其詩亦清新俊逸頗爲當時士夫所欣賞子克繼由貢生授府谷訓導孫滋桂亦歲貢生

張希聖字憲伯狄道人 恩貢生好吟詠尤精書法郡嘗早屢祈

不雨知府高錫爵延希聖齋戒沐浴徒步禱於卧龍山是日大雨如注人皆異之子世永字仙同精音韻尤旁讀齊諧志怪及唐宋以來稗官野史每被酒抵掌而談人多環而聽之同時師帝典歲貢生善詩賦於經書條註多所發明

苟 淳字還初狄道庠生年九十六猶偕其子孫數十人赴歲試或有諷其勞者淳曰僕偶與小兒嬉戲耳焉知勞乎及領卷仍第一學使愈大奇之弟濂字在滋 恩貢生博學能文知府高錫爵纂修府志濂與貢生李杰共襄採訪焉後銓乾州訓導未赴任卒族弟必達字成章歲貢生文名與諸兄埒嘗與鄉飲正賓知府某額其門曰熙州高士

張繼良字松友狄道歲貢生其叔母王氏撫孤守節繼良奉養成其志知府某高其行時造廬焉嘗得古檜一株植於齋前日與之

甘肅新通志

卷六十六

人物志 羣材一

四十七

吟哦相對於世味淡如也時同社生張略者字有三亦風雅士嘗於小圃築亦可亭栽花種竹讀書其中亦於世無所慕云

趙穀璧字子執狄道人與弟蒲璧同時生生時母夢雙璧入懷因以名之兩人貌相類見者不能別而才氣亦相埒穀璧康熙乙酉拔貢蒲璧亦中是年副榜人皆異之蒲璧後寄籍張掖子廷桂歸狄道省墓遂留不去數年卒廷桂雍正己酉拔貢豪爽多才氣有

諸父風

史秉鐸字木天狄道人性聰穎博極羣書以歲貢官鄜州訓導弟秉瑛字五修賦性誠篤不喜應酬惟以讀書課子爲本務後以歲貢食於家秉瑛子謙博學能詩由拔貢生歷鄆縣咸陽甯朔教諭後致仕歸秉鐸子誠亦由歲貢官中衛縣訓導兄弟同官一郡庠序榮之謙著書見藝文目錄

雷鳴夏字豫叔狄道人少孤貧力學不倦工詩文性嗜酒與人坦夷無城府後以歲貢銓維南訓導辭不赴逾年卒

王維新字衍周狄道人穎敏工詩凡漢魏六朝唐宋諸家無不研究而尤深於陶杜後以歲貢官淳化訓導著書見藝文目錄

張翥字翰齋狄道人父天成官杭州稅使翥隨侍讀書其詩文遂大進後以歲貢訓導高陵卒於官

亢英才字鴻儒狄道人歲貢少好學晚喜爲詩與王綬張翥諸人聯洮陽詩社著書見藝文目錄同時宋馥字爾馨歲貢生善屬文尤工山水畫士大夫爭重購而藏之

漆正一字太初狄道人少爲僧值學使歲試諸生寓僧舍者甚衆正一見而慕之遂反初服不由師授一試輒冠軍其書法尤爲時所重人號柳林先生後貢成均

甘肅新通志

卷六十六

人物志 羣材一

四十八

張國賓字子尙狄道人庠生家貧好學尤工書法知府李如潞知縣閻瑄雅重之延之不就致粟焉狄道號善書者先國賓有丁友仁後國賓有張汝楫俱以高才食餼其清操略與國賓同

馬喜雄字雲飛狄道人以歲貢銓保安訓導未赴任卒喜雄性嗜酒好吟詩得意者人多錄而藏之嘗醉卧雪中逾夜家人始覺因自號卧雪山人每生徒問字者至率攜酒三壺以爲贄復自作三壺齋主人傳同時張樂賢字賓野邑庠生好讀書尤深於周易老子彈琴賦詩脩然自得著書見藝文目錄

張逢箕字維南狄道人博涉典籍里人號日書箱後以歲貢官商州學正卒弟逢壬字位北增生性喜吟詠知府許某手書其齋曰可與言詩著書見藝文目錄孫克念庠生

張守字有爲狄道人年五十始發憤力學少年廢學者多感而

勵業焉以歲貢官華亭訓導卒於任同社友晏毓桂毛文標皆年少有雋才

趙 援字子正狄道人由增生充供事授上海縣巡檢後以補官歿於山西泰安驛旅櫛蕭然同里武生樊必遴老而好詩人多稱之援著書見藝文目錄

李華春字實之狄道人乾隆丁酉舉人官陝西清澗縣訓導陞富平縣教諭勤訓迪兩邑士多感戴著書見藝文目錄

李遇春字鶴亭狄道人乾隆己亥舉人 賜翰林院典簿主講洮陽書院一時名士皆出其門姪穎發字達甫嘉慶丁卯舉人官陝西安康縣教諭著書均見藝文目錄

李 苞字元方狄道人由拔貢登乾隆癸卯鄉榜官崇信縣訓導以卓異推升廣西陽翔縣知縣以憂歸服闋授四川劍州蓬州知

甘肅新通志

卷六十六

人物志 羣材一

四十九

州山東濱樂分司鹽運同能於職大吏器之性好詩在籍與史聯及李實之諸名士聯社會詩後出仕每公餘仍多吟詠著書見藝文目錄

史聯及號蘿月毛啟鳳字鳴周張某字玉崖張某字竹齋王元德字牧之俱狄道人數人皆長於詩此唱彼和一時稱盛著書均見藝文目錄

陸芝田字秀三狄道人嘉慶辛酉舉人官陝西蒲城縣教諭以忤當道歸生平長於天文嘗讀王漁洋文集謂明末乙酉年日躔壽星之次淮徐星野不宜用兵必蹶上將軍漁洋意謂指高傑我則謂其必係史可法及以太乙法推之絲毫不謬此可見其一斑著書見藝文目錄

張應蘭字畹亭狄道人嘉慶辛酉拔貢官文縣教諭主講洮陽書

院十餘年門下成就者百餘人從學孫廷選成進士

許廣陞李振新俱狄道人廣陞嘉慶九年舉人陝西涇陽訓導陞興安府教授訓迪有法歷登薦剡振新由拔貢官伏羌縣訓導課士崇尚實學文風大振

李玉臺字鏡安狄道人道光乙酉舉人官四川知縣歷署慶符綦江溫江等縣值髮逆猖亂辦理川黔軍務著有勞績 奏獎花翎以知府用後乞歸卒於階州途次子景豫寄籍西甯同治癸酉拔貢

姜 政字子聲狄道人道光甲午舉人官兩當縣訓導旋調山丹訓迪有方同治回亂同知縣某辦理城防晝夜巡守閱數月城賴以全同張廷選開郡城北馬寶泉路以利行人商旅便焉至今稱道弗衰

甘肅新通志

卷六十六

人物志 羣材一

五十

張廷選字子青狄道人道光乙未進士選翰林院庶吉士授編修丁酉典福建鄉試以親老歸主講蘭山書院與整屋路德齊名廷選留心經世之學狄道赴蘭州路舊由關溝門直入上摩雲嶺溝深二十餘里細流沮洳夏秋水暴漲路輒阻冬積冰層立多成深塹車馬倒斃者無數民甚苦之廷選白諸大府籌款改修新路商旅賴之狄城濱洮河南北皆旱田廷選集衆開渠溉田費款鉅萬三年始成旋以土性不堅復淤塞廷選以憂勞卒子保齡椿齡另有傳

徐 烺字焦窗狄道歲貢生平生設帳教授邑士多出其門學規整嚴雖盛暑必公服以見諸生每戒學者曰疏慢二字誤盡一生邑士識與不識咸宗仰之

牟 標字霞臣狄道人道光庚子舉人咸豐庚申進士官陝西知

縣署隴州知州值回亂州界與張家川毗連逆賊欲西行恐隴民躡其後故傾巢攻隴務在必克標率隴民戰守兼施十閱月以勞卒於任百姓環署號哭如失怙恃事 聞優卹如例歿後貧不能歸因葬於鳳翔子四家驥家駒州廩生瑞麟陝西試用從九孫瑾鳳翔籍光緒乙酉拔貢官高陵縣訓導

邊毓英字琢魯狄道人道光己酉拔貢咸豐己未舉人官階州學正值髮逆亂後文教衰微士少矜式毓英月課訓士孜孜不倦不數年文風大振陞授西甯府教授未赴任卒士林惜之

陸希曾字貫一狄道人由優貢舉咸豐元年 制科官雲南通判值回亂鶴麗劍各處相繼失守希曾署劍川州路梗塞因與知府某退紮永北由永北進攻麗江克之上官嘉其勇保同知後改署維西通判親赴阿墩子昌普桶一帶調集蠻奴各練二萬名克復

甘肅新通志

卷六十六

人物志 羣材一

五十一

中甸維西進攻鶴劍後署麗江府布政使岑毓英調赴鎮雄行營下東川協同總兵官楊某克復永北事平署會澤縣知縣中甸同知武定直隸州補普洱府知府後卒於官子灝雲南按察經歷

李玉珍狄道世襲雲騎尉豪俠有大度咸豐間髮逆亂征安徽江南等省以功保副將銜參將爲巡撫胡林翼總督曾國藩所賞拔賊平即還里先是玉珍徙軍時有討債者追索不已玉珍計無所出州差某慨假百金至此先拜某差後謁同城官長其不忘報如此旋署洮州協副將蘭州城守營參將調補陝西延安營參將卒於任所兵民舉哀巡撫遣員致祭

廩生陳光華字皖堂增生張博淵字時泉俱狄道人光華學有根柢中年棄舉業教讀終身著書見藝文目錄博淵係明鄉賢張萬紀九世孫性剛直長於詩訓蒙終身邑知名士多出其門

張理治字燮臣狄道庠生同治壬戌狄河難作攜家避入南山雖干戈擾攘而讀書不輟後聞城陷攜家復至洮岷甯伏以至漢南等處凡數年歷難之處皆筆之於冊曰使後人勿忘此險阻艱難庶可自立也著書見藝文目錄

張錫齡字夢九狄道庠生同治回亂城陷舉家三十餘口悉殉難錫齡與藍銳縋城出赴峽城招忠義勇千餘圖復仇殺賊官堡之役悍賊逾萬血戰四時藍銳陣亡錫齡潰圍出嗣佐范銘軍勦賊以功歷保直隸州銜補用知縣錫齡以舉家殉難不忍仕進遂退居於家課子弟以終著書見藝文目錄子明遠舉人

趙順字友坤狄道人生有膽略幼時兒戲即布置營壘以作攻守之勢識者奇之同治二年回陷狄城闔家殉難順縋城出對衆泣誓滅賊復仇即投忠義軍隨大軍解鞏甯通渭諸圍克復岷州

甘肅新通志

卷六十六

人物志 羣材一

五十二

每與賊戰勝人皆搜取賊物順獨窮追殺賊奮不顧身范銘嘉其勇敢委帶精銳後營進勦洮州旋即克復新舊兩城總督楊岳斌給予五品軍功由是連年征勦克復狄河及西甯巴燕戎格等城身受重傷裹創力戰將軍穆圖善總督左宗棠連章保奏歷擢花翎都司調帶毅軍中營駐防潼關光緒二年以病歸里二十一年回匪圍狄道順復團練防守總督陶模聞順調度有方派歸何建威麾下管帶威定後營渡河勦賊至景古城朱家山連破賊壘又進解河州甯河諸圍提督董福祥臚列戰功以聞授游擊加副將銜二十二年派防岷州木竹寺二十五年調紮洮州嘉木關後因舊創發卒於防次事 聞蔭一子

何建威狄道人同治初由武童投軍隨副將范銘克復岷州平燬梅川紅水溝等處旋營帶玉字衛隊兼領番兵進攻洮州屬之王

家墳黑石嘴卞數十處殺賊甚夥旋隨河州總兵金丹札布收撫洮州回匪未幾復叛帶精銳親兵馬步士勇克復洮州後改建字營截剿甯遠縣新市鎮下川竄賊歷保副將銜參將又攻打黑山頭賊壘加果勇巴圖魯並將建字營改爲定西軍克復巴燕戎格光緒三年隨同嵩武軍與蜀軍克復吐魯番加總兵銜六年招募左軍前往直隸京師等處修治河工十七年補授陝甘督標參將調授陝西甯陝參將二十一年署西安城守副將奉檄剿辦海城賊匪未至改援狄河督兵急進比至賊已聞風夜遁以功保記名總兵加提督銜旋補河州鎮總兵隨董福祥招撫降回遂密遣李乾等乘閒剿滅高家集一帶回匪並平燬封臺賊巢調補肅州鎮總兵卒於任

李 乾字健堂狄道人有膽略同治三年投効忠義軍遇賊輒爭

甘肅新通志

卷六十六

人物志 羣材一

五十三

先無少卻善使長矛每與賊戰矛到處輒傷雙目將軍穆圖善嘉其忠勇委帶建字前營旋又改帶定西左營前後與賊大小四十四餘戰克復洮岷狄渭以及巴燕戎格等十餘城攻破鹿麻葑臺黑山頭等處賊巢無算歷保花翎副將賊平後旋里光緒二十一年狄回復叛乾練團自守城賴以全總督楊昌濬奏請剿辦逆回委乾統帶威定中營乾暗渡洮河解景古城圍與賊戰於朱家山馬家集等處皆大破之生擒賊酋馬維屏事 聞以提督銜總兵交軍機處記名兼統威定後營後賊平卽請裁兵以節饟並以餘饟二千修補城垣及 文廟三十三年卒於家子增芳庠生增穰舉人

潘衍慶狄道武生同治回亂出貲練團保鄉里後投營剿滅各處賊巢并克復南路各城屢立戰功歷保守備

王應鐘字鏞堂狄道廩生平生以禮自持家居數十年人無鬪爭興訟者里中婦女無敢出汲教學視其才之高下而造就之貧寒子弟不計束脩邑中知名士半出其門

楊文耀字煥若狄道歲貢生積學有品設帳城中四鄉學子皆歸之文耀或講經或論文終日危坐未嘗有倦容

劉培藜字含青狄道歲貢生博學能文教學里中歷三十餘年凡有來學不計束脩孜孜訓迪著書見藝文目錄

張庭桂字月橋狄道增生同治亂後官辦招墾人皆占地以爲身家計庭桂獨與其弟庭梅於草萊荆棘中分行鄉里清獲舊時學田千餘畝使狄道學校於灰燼之餘得以廢而復興者庭桂兄弟之力也

王吉士字藹堂狄道歲貢生官通渭縣訓導抵任後卽傳集諸生

甘肅新通志

卷六十六

人物志 羣材一

五十四

詣明倫堂定期聽講諄諄誨以修己治人之道通渭諸生爭自磨勵不數年文風大振吉士學有淵源制行不苟著書見藝文目錄魏 椿字壽卿狄道歲貢生官平番縣訓導勤於訓迪以老乞休主講洮陽超然兩書院一時英俊多出其門著書見藝文目錄

石光岳字子五狄道貢生年八旬猶手自鈔書勤學不倦回亂避難省城以教學終身門下多所成就子士傑同治癸酉舉人官伏羌訓導孫作棟光緒乙酉舉人丙戌進士官貴州知縣

吳雲鳳字翼丞狄道人少負才名同治回亂從曹克忠軍勦賊由庠生保教職旋署洮州廳教授後仍從軍歷保同知光緒五年請拆毀逆回拱拜以杜亂萌乙未之亂助州官辦城防後以憂勞卒黎懷德狄道人同治之亂由武生聚鄉團數百人守松鳴石保護難民萬餘力戰十餘次斃賊數百人名大譟旋奉檄帶勇三百赴

鞏昌改河鎮後營隸梅某部下勦辦督標潰兵疏通西路糧道嗣進兵米拉三溝懷德獻策大軍步步爲營賊不能攻其後果獲勝及克賊巢奮勇當先手刃逆目連破賊卡十三旋解省城圍搗陳馬老巢中鋪之役悍賊萬餘環攻內有裹白頭者三百號敢死軍懷德又獻策謂賊利在急戰我堅守不出待其疲而擊之必獲勝後出戰果捷斬馘裹白巾者二百餘級賊宵遁遂克復狄道攻高家集黑山頭屢立戰功歷保總兵署涼州後營游擊著有政聲又勦夏夏教匪全活良民甚多光緒甲午統帶魁字三營奉檄東征駐天津條聞河逆復煽急欲返旆勦滅乃積勞嘔血而卒

馬有世字輔臣狄道人同治初投建字營効力以功歷保藍翎守備光緒甲午賊復圍城有世帶城防馬隊守城奪取雲梯兩架後遇賊戰於毘盧寺賊敗宵遁復隨大軍駐河州白塔寺十月開赴

甘肅新通志

卷六十六

人物志 羣材一

五十五

黃河北岸途遇股賊有世率本部兵大呼擊之殺賊甚衆鏖戰終日竟抵大營時同行軍糧八馱軍裝四十馱皆賴以無失以功保花翎游擊後卒於官

金培莢字堯階狄道人幼有膽略同治回亂投効開字營攻破米拉溝及陳馬莊賊巢身受槍傷歷保藍翎守備

張聯乙狄道人由廩生舉光緒乙亥 制科博學善書設教城中門下成就甚多二十一年回亂辦理城防晝夜勤勞從總兵何建威勦賊以功保教諭後積勞卒於行營 賜州判銜

李九江字清溪狄道人同治回亂棄學從戎賊平旋里光緒壬午由廩貢舉於鄉癸未成進士官湖北棗陽縣知縣歷署咸甯江夏等縣政聲卓著民情愛戴

晏永亨字乾三狄道人光緒甲午回亂單騎冒圍出請大軍援救

見何建威責以大義兵赴州城解四窪山石岡岔各寨圍血書數上而卒未派援未幾寨破殺人甚多永亨憂勞得狂疾卒

石補天字柱臣狄道沙泥人體貌魁偉聲如洪鐘習騎射精天文奇門之學好談兵事同治四年入伍隸提督羅進賢部下五年標兵變徧地皆土匪東路道梗補天率四十餘人出搜賊去營數里賊伏起衆萬餘補天且戰且退自辰至申殺賊數十人斬獲首級十餘道始通六年移紮安定河賊數千夜襲城陷之補天率本隊士卒迎擊賊敗走城遂復九年隨傅先宗駐狄道勦河回一朝攻破十八壘賊退保新坡阻糧道補天又破之十二年隨嵩武軍總統張耀赴新疆征白彥虎等既平又隨赴山東直隸等處積勞保至二品銜儘先補用副將旋辭歸光緒二十年陝西巡撫鹿傳霖檄調管帶撫標後營日本釁起奉調赴京駐防天津二十一年河

甘肅新通志

卷六十六

人物志 羣材一

五十六

回叛復奉 命援甘卒於道

楊沛霖沙泥人光緒壬午舉於鄉癸未成進士官河南新野縣知縣抵任後革積年裁收包納銀糧等弊民大悅後卒於官喪歸士民遮道相送多泣下者

崔 岱字方侯渭源人順治時由拔貢官湖廣慈利知縣時兵革未息縣近山隅盜賊蟠踞歲派民弓矢筋角費九百餘兩官吏又從而侵漁民苦之逃入賊者衆岱爲請免上官允之民在賊者聞之漸就撫賊勢少衰僞總兵趙三才聚衆數千屢討不克岱單騎入賊巢諭以禍福卽降兵燹後民廬灰燼多露處岱捐俸築堡民稍得所擢直隸深州知州培學校修城郭革冗費巡撫某委鞠疑獄多所平反再擢山西平陽府同知後以忤當路歸

趙光瑞字虹洲原籍遵化人弱冠卽以襲廕掌印靖遠衛旋陞甯

夏都司超授漢羌副將因世變家居事繼母王氏以孝聞鼎革後上聞光瑞世胄忠貞特授副將協南安總鎮范銘恢復武都戊子秉節洮陽適回逆犯順光瑞率親丁百餘騎撲滅無遺已而河西回逆蜂起光瑞蕩平之己丑山西變起倉猝光瑞爲先鋒帥官兵夜渡黃河與禁旅會合運籌決勝所至歸誠遂擢都督同知總兵興安未幾逆寇數萬潛犯白土關光瑞率勁旅數百禦之以衆寡不敵自引塵柄刺喉死

陳一貫字了一靖遠人順治戊子舉人負性曠達家屢空誦讀不輟歷國子監武學教授衡文精鑒不爽尤博通異書忽一日謂從者曰試往看太和殿火否已而果然歎曰吾其休矣時報陞戶部司務未任卒

李守魁字斗庵靖遠人左都督任延綏鎮波羅營副將從靖逆侯

甘肅新通志

卷六十六

人物志 羣材一

五十七

張勇征勦回寇後又從奮威將軍王進寶底定黔蜀屢立戰功

姚 寵靖遠人分守山東萊州沿海游擊先是寵家貧有勇略賊叛據南山總制孟某榜示軍中有先登開門迎進官兵者重給賞敘功錄用寵不避矢石自城北角入砍殺無算卽賞給百金以守備敘用後屢立戰功歷陞至游擊

牛一麟靖遠人官甘肅提標參將先是衛城爲寇所據一麟從孫思克統兵入勦保護闔城秋毫無損

苟好文靖遠人三藩之變隨奮威將軍王進寶恢復川蜀屢立戰功推授浙江温州府磐石營左都督管游擊事後以疾卒於官房世純字樸如靖遠人少負奇志勇略過人吳逆之變以武生從征川蜀又從征噶爾丹屢立戰功題敘授涼州鎮標游擊

种廷璋字士莪靖遠人康熙甲子副榜幼穎敏特異爲文有奇氣

工於駢語及詩古文詞行楷亦得衡山筆意士林珍焉子四人皆能世其家學

展譽美字在中靖遠人官朝邑訓導性耿介家貧讀書寒暑不易設教師範甚嚴不以脩脯爲念所得束脩生徒有空乏者出以給之門下多以科第顯及歿門人俱圖像爲文以誌德教

潘 福字備五鄉賢育龍長子勇敢絕人以武生隨振武將軍孫思克征噶爾旦奮勇當先戮力破賊以軍功授甘肅提標右營游擊

潘 祥字大千育龍次子康熙壬午舉人壬辰成進士由翰林院檢討改授戶部郎中官四川重慶府知府性孝友雅不事華靡遇事沈毅有爲與人交虛懷善下毫無貴胄氣爲文雄深渾健俯視一切所著書古文詞專稿已刊行世

甘肅新通志

卷六十六

人物志 羣材一

五十八

潘 祺字鶴年育龍第三子康熙甲午舉人弟袞字子純辛卯舉人寬厚謙遜自童子時已然讀書務明聖賢之理不屑以帖括見長汪士鋐衡其文許爲大器年十八與弟禕同舉於鄉

潘 禕字大中育龍第六子康熙辛卯舉人生具異稟讀書過目不忘七歲卽曉音韻人有神童之目年十五與兄袞同登鄉榜官廣西思明府同知

潘之善字元長育龍從孫康熙三十五年從征噶爾丹於昭莫多中火器傷以功授肅州游擊 賜花翎領兵駐防哈密五十四年策妄阿刺布坦遣賊二千來擾之善率兵二百擊敗之遷潼關副將五十六年隨靖逆將軍富甯安擊準噶爾於烏魯木齊斬級最多五十九年復擊準噶爾於烏魯木齊雍正元年羅布藏丹津叛有賊三千來犯之善大敗之 優詔嘉獎四年擢川北鎮總兵入

觀命叩謁 景陵 賜賚甚厚調西安鎮署陝西提督屢疏皆稱 旨手諭褒獎七年以疾乞休 遣太醫馳驛往視 賞銀千兩爲調理之用尋署固原提督八年卒 賜祭葬如例
徐 讀靖遠人恩貢生康熙五十九年出征巴里坤應援花海子一帶地方身受礮傷屢立戰功加守備

李述泌字艷儒靖遠人事繼母孝雍正元年由行伍出征西海進剿西藏七年出征巴里坤七載屢立戰功歷官至四川永甯協副將署肅州總兵後告歸優游林下二十餘年卒

岳鍾璜字呂瑞鄉賢鍾琪從弟父超龍由把總累遷游擊雍正二年平口外鐵布等番有功擢河州副將遷天津鎮總兵擢廣西提督十年卒鍾璜少從威信公効力雍正八年授藍翎侍衛 命乾清門行走 賞戴花翎乾隆元年擢四川參將遷副將八年擢建

甘肅新通志

卷六十六

人物志 羣材一

五十九

甯鎮總兵調江西之南贛雲南之昭通十六年擢廣西提督十九年調任四川在川十餘年以九土司會攻金川前後與總督開泰阿爾泰等調兵彈壓宣 諭德威各酋讐服退還碉卡并獻所掠人口辦理皆稱 旨三十一年卒於任 優詔議卹 賜祭葬諡莊恪

宋可進靖遠人雍正間以京營參將征剿卓子山圍七日夜一日三捷身受重傷屢立戰功歷官至甘州提督世襲阿達哈哈番子愛字體仁康熙庚子武舉雍正癸卯成進士由侍衛洊陞古州鎮總兵後官至貴州提督

馮吉品字貢山靖遠人性沈毅果敢有爲由行伍挑選擺牙喇歷官山西太原鎮直隸正定鎮總兵所至恤軍愛民與士卒同甘苦服官數十年歸田後與寒素無異

李 基靖遠人由行伍出征西域有功復進剿大小金川奮勇爭先不避矢石帶傷數處官固原鎮八營守備

李宗經靖遠人同治六年以克復靖城功保獎六品藍翎是年秋出貲招募土勇五百投哈密辦事大臣文麟麾下克復關外各城出力歷保總兵銜以副將補用授西甯南川營都司

蕭福祿字壽山河州人乾隆年間出師金川著有勞績嗣剿平底店石峰賊進征大小米溪五坐雲花果園等處積功擢至副將加振勇巴圖魯嘉慶五年進征手板厓長坪一帶六年剿滅汧陽會匪洵膺專閫 賞賚優渥旋授巴里坤總兵歷宣化宜昌狼山各鎮總兵道光元年署江南提督四年授浙江提督告歸 賞食半俸九年二月卒 御賜祭葬諡襄恪

王明德河州人武勇超羣所至奏功屢蒙 詔嘉獎擢四川建昌

甘肅新通志

卷六十六

人物志 羣材一

六十

總兵卒於任 賜葬祭如例

蕭福楨福祿弟由武生歷官巴燕戎格游擊轉戰川陝楚豫隨征喀什噶爾歷有戰功署西甯丹噶爾副將

張 和字理堂河州人道光乙巳進士官直隸涿州知州地當衝繁而處之裕如治 梓宮道及 御道賦役有法民不勞擾著書見藝文目錄

呂 祥河州人循化參將年七十餘告歸田里咸豐十一年撤回叛總督沈兆霖命肩輿舁至省問方略言中機宜後令佐署鎮趙秉建河城被圍祥爲畫戰守策城賴保全

張興祥河州東鄉人性孝友樂善好施有善人之稱同治初逆回之變村回勸興祥毋入城避亂謂興祥善人必不見害也興祥盛氣陵之曰甯入城爲斷頭鬼不降汝輩貽羞名教賊怒用矛刺之

傷股財物搶掠一空然終免於死厥後城陷兄弟及家屬皆殉難興祥念存宗祀縋城出不數武又被賊擄拷掠備極苦楚至夜乘間逸流落他方者數年及河湟肅清始歸復營家計既有贏餘仍周給親族無吝色自謂身歷喪亂弗願多財但願得一賢子孫足矣子某亦殉難孫得順曾孫榮食餼人以爲善德之報云

王文繡河州貢生官清澗訓導砥德礪行爲士林所遵著書見藝文目錄

朱倫河州人忠烈貴之孫也由雲騎尉世職累立戰功官至甘州副將

劉玉江字松山河州人同治閒從景廉征新疆以功歷保總兵嘗臨陣呼賊首曰吾今日必取汝賊首方嫚罵玉江馳馬入賊中取首級以出軍中稱爲趙子龍後歸里年七十二卒

甘肅新通志

卷六十六

人物志 羣材一

六十一

馬占鰲字魁峰河州人同治十一年王師征河州占鰲率衆降隨被錄用邊事皆倚辦擒逆回閔殿臣誅之請誅馬永林當道不許屢征諸番以功保補用總兵督帶鎮南馬步軍病革謂其子安良曰國恩不可負馬永林必反汝謹備之後果如其言卒年五十七

馬海彥河州人善鳥槍不虛發光緒乙未隨甘軍征西甯賊出拒戰有紅衣賊乘馬指揮海彥顧謂諸將曰此賊酋殺之則賊氣奪可一戰克也手槍遽發紅衣賊應聲落馬官軍乘之賊果敗累保至總兵銜補用副將從提督董福祥入衛京師庚子之役常出奇計旋西還道卒

馬福祿字壽三河州人少有大志及長力舉百鈞光緒乙亥由武生舉於鄉庚辰成進士以衛守備用陳情終養訓弟福祥福壽皆

成名居鄉排難解紛爲漢回所佩服乙未春循化回亂福祿奉文練五百人禦崔范兩峽口率弟姪及親軍數十人援積石營殺傷過當逆首韓古魯班以大隊來復奮擊大勝適楊美環馬老九焚燒東鄉花寺等處提督雷正綰檄福祿還河州帶精選馬隊防剿總兵湯彥和旋調赴白莊委帶壽字步隊進攻撒逆時東鄉逆目閔伏英破大固攻古城西與撒逆合入福祿莊舍焚其屋宇擄掠一空進圍河城福祿說彥和移師東援次雙城畏賊不敢進福祿屢爭弗聽遂被圍福祿出戰賊稍引卻日久援絕彥和棄軍夜遁福祿見軍無主帥乃率弟姪護其父某並挈彥和之姪與其幕賓取道老鴉關入番難民沿途從者男婦約數萬人由番抵洮保全無害福祿復閒關赴省經官紳保薦奉總督楊昌濬檄招募安甯馬步隊各一旂由北路進剿軍至白塔寺而提督董福祥已解河

州城圍福祿晉謁承詢方略令率所部勦米拉溝連戰皆捷陣斬逆酋馬采哥弟福祥亦執首逆冶主麻並匪黨數千人詣大營董福祥喜有虎將之譽飭赴河州會辦善後無枉無縱以前後功薦保副將加總兵銜戊戌董福祥奉 命帥師北上福祿統領簡練馬步各營旂從駐防山海永平等處土馬精強爲諸軍冠庚子中外衅啟郎房一戰身率士卒敵愾及正陽門樓爲外人占據福祿提兵登城立奪七卡夜戰中礮陣亡弟福貴福全姪呈圖兆圖俱死之弟福祥代領其衆扈 駕西幸後補西甯巴里坤等鎮總兵

平涼府

漢梁 松字伯孫鄉賢統子也爲虎賁中郎將博通經書明習故事與諸儒修明堂辟雍郊祀封禪諸禮永平元年遷太僕子扈亦敦詩書爲長樂少府

李 翕字伯都漠陽阿陽人天姿明敏敦詩說禮幼而宿衛及長出令澠池治峻欽之道有黃龍白鹿之瑞其後爲武都太守政不肅而成民不嚴而化又有嘉禾甘露木連理之祥皆圖畫其象刻石詳西狹及郿閣頌中宋曾鞏歐陽修爲之跋皆盛稱之

三國魏皇甫隆安定人嘉平中爲敦煌太守初敦煌不甚曉田嘗蓄水使極濡洽然後乃耕又不曉作樓犁用水及種人牛功費旣巨而收穀更少隆到教作樓犁又教衍漑歲終率計其所省庸力過半得穀加五

甘肅新通志

卷六十六

人物志 羣材一

六十二

南北朝梁皇甫亮字君翼鄉賢和之弟神武命爲大行臺郎中亮率性任眞不樂劇職除司徒東閣祭酒後降梁以母兄在北求還梁帝不奪至鄴無復宦情人白鹿山恣泉石之賞賦詩超然自樂性純樸無片言矯飾後除任城太守病不之官終於鄴

北魏皇甫麟字眞駒安定朝那人賦性卓越夙負物望一時豪俊無出其右者刺史王公聞麟名辟爲州都尋爲主簿延興中涇州夷民萬餘家詣闕請麟爲統酋帝許之太和二十年仇池不靖扇逼涇隴召麟爲中書博士加議郎馳驛慰勞陳示禍福兇頑感悟面縛歸降者數萬人刺史任城王嘉其重望表爲長史由是聲震朝野復除爲清水太守帶領軍鎮景明二年除爲別駕輔弼有方上下悅服三年督護新平安定二郡事正始元年以鎮撫開塞復表爲武始太守三年秦涇叛逆表麟爲都長史四年元王復表爲別

駕驎以年老固辭王重加厚禮頻命乃就生平屢歷顯宦而常自貶抑若微賤然凡所佐涖丹心奉公視金帛如草芥雖伯魚之無私楊震之卻賄不能過也年七十五卒於家

皇甫真字楚季安定朝那人弱冠以高才庾拜爲遼東國侍郎甝嗣位遷平州別駕時內難連年百姓勞瘁真議欲寬減歲賦休息力役不合旨免官後以破麻秋功拜奉車都尉守遼東營邱二郡太守皆有善政及僞僭位入爲典書令後從慕容評攻拔鄴都珍貨充溢真一無所取惟存恤人物收圖籍而已僞臨終與慕容恪等俱受顧託慕輿根將謀爲亂真陰察知之乃言於恪請除之恪未忍顯其事俄而根謀發伏誅恪謝真曰不從君言幾成禍敗呂護之叛恪從真計取之真爲冠軍將軍別部都督師還拜鎮西將軍并州刺史領護匈奴中郎將徵還拜侍中光祿大夫累遷太尉

甘肅新通志

卷六十六

人物志 羣材一

六十四

真性清儉寡欲不營產業飲酒至石不亂雅好屬文凡著詩賦四十餘篇後見知於王猛猛謂權翼曰皇甫真固大器也從苻堅入關爲車都尉數歲而卒

隋皇甫績字功明安定朝那人三歲而孤外祖韋孝寬愍其孤幼不加嚴訓績歎曰我無庭訓何以自立遂感激好學略涉經史周武帝時引爲侍讀轉宮尹中士武帝避暑雲陽宮衛刺王作亂百僚多遜績聞難赴之遇太子於元武門太子持績手悲喜交集帝聞而嘉之開皇初拜都官尚書出爲晉州刺史言陳有三可滅上嘉勞而遣之及陳平拜蘇州刺史高智慧等作亂破之拜信州總管徵還京師卒諡曰安

梁 睿字恃德安定烏氏人父禦西魏太尉睿少沈敏有行檢周太祖時襲爵廣平郡公進蔣國公歷涼安二州總管俱有惠政後

益州總管王謙反命睿爲行軍元帥率兵討謙斬之劍南悉平威震西川進位上柱國睿威惠兼著民夷悅服聲望逾重隋高祖受禪眷待彌隆睿復上平陳之策上善之時突厥方強復陳鎮守之策十餘事上嘉歎久之睿自以周代舊臣久居重鎮威名太盛內不自安遂謝病闔門不交當代卒諡曰襄

梁彥光字脩芝安定烏氏人隋初爲岐州刺史甚有惠政嘉禾連理出於州境開皇二年上幸岐州悅其能下詔褒美岐州俗淳以靜鎮之合境大化課最第一轉相州刺史相俗多詐爲之作歌稱其不能理化坐免歲餘拜趙州刺史彥光請復爲相州上從之豪滑聞而嗤笑彥光下車發摘姦隱有若神明合境大駭狡猾潛竄乃招致大儒每鄉立學教授策試人皆刻勵風俗大改吏民感悅略無爭訟卒諡曰襄子文謙宏雅有父風遷鄱陽太守治稱天下

甘肅新通志

卷六十六

人物志 羣材一

六十五

最徵拜戶部侍郎

宋范 達字仲通華亭人康定中兄遵死於敵錄達爲三班奉職隸范仲淹麾下仲淹勉以問學策葛懷敏必敗知名擢荊州都監拔古渭城轉通事舍人治平二年以檢校太保同簽書樞密院出領陝西宣撫事判渭州子執中遷於同谷

姚 麟字君瑞鄉賢兄弟攻河州時麟在兵間中矢透骨以強弩出鏃笑語自若積功至皇城使從李憲討生羌擒冷雞朴轉英州刺史元豐間西討從劉昌祚出戰勝之督諸軍討堪哥平經略使盧秉上其功賜金帛六百元祐初擢威州團練使歷殿前都虞侯紹聖三年拜武康軍節度使王瞻取青唐麟以爲朝廷討伐方息肩奈何復生此大患已而瞻果敗徽宗立進檢校司徒卒贈開府儀同三司麟爲將沈毅持重不少縱捨宿衛將嘗犯法詔釋之麟

杖之於庭而後請拒詔之罪故所至肅然

姚 雄字毅夫兕子少勇鷲有謀年十八卽佐父討金湯以百騎先登奪隘又成荔原之功歷涇原秦鳳將累佐麒麟使紹聖中渭帥章棗城平夏夏人傾國來爭雄與麇鬪流矢注肩戰愈勵敵引卻追躡大破之斬首三千級徙知會州擊破羌人獻馘二千哲宗遣使勞問徙河州种朴戰沒王瞻軍陷敵中雄自鄯至湟四戰皆捷拔出之遂築安鄉關夾河立堡以護浮梁通湟水漕運商旅負販入湟者始絡繹於道復加防禦使建中靖國初議棄湟州雄以爲可棄蔡京用事以棄地罪停雄官光州居住後竄金州及西甯諸戍阻絕乃起雄權經略熙河使召詣闕爲中太乙宮使引疾納節鉞改左金吾衛上將軍尋以檢校司空致仕卒贈開府儀同三司諡武憲其弟古亦以邊功官至熙河經略使

甘肅新通志

卷六十六

人物志 羣材一

六十六

明楊思道字夢輔爲元鞏昌總管善易學時明兵北伐思道乃棄官遁華亭西山大將軍知其賢命署縣事遭兵亂餘民止八戶思道乃招諭民戶凡千一百有奇遂葺縣治修學校久之思道退占籍爲武村里人藩臣薦爲本學訓導陞山西襄陵教諭九年致仕黃 種隆德人永樂中貢生除戶科給事中鯁介不苟久居清要及歸行李蕭然

余 俊平涼人宣德正統閒歷官介休聞喜教諭俱有成效陞成都府教授

薛 正華亭人正統丁卯舉人授山東夏津知縣九年考最陞高唐知州夏津人請留從之大治卒夏津人立德政碑

郭 遯靜甯人涿州刺史堅子工騎射成化四年從總督項忠討石城賊戰輒當先生擒僞招督王滿四授秦州衛鎮撫十三年從

都御史余子俊討洮岷叛番有功陞百戶累官指揮僉事嘗將精兵摧鋒陷陣屢有斬獲尋陞都指揮僉事

趙 玉平涼人鄉賢時春父也正德二年省親平谷途拾旅金二百兩待其主還之以歲貢官元城霑化訓導課士不辭勞瘁視諸生如子弟已而登科甲者十餘人

楊 名莊浪人正德間爲力士時逆黨擅權誤國名奮擊殺之尋陞錦衣衛百戶

杜 孝莊浪人以恩貢授山西長治縣佐初監造皇綢機戶持例金以獻卻之聞諸當道咸獎其廉尋以直致仕歸

靳 賢字子哲靜甯人舉隆慶元年鄉試性至孝萬厯中知沁源縣俗多逋租率由田土未清賢履畝勘丈絕其兼并自是沁源無催科之累又捐俸置機房以教民織縣城土築賢至始甃以磚沁

甘肅新通志

卷六十六

人物志 羣材一

六十七

人感戴爲之立祠尋擢潞安府通判署事澤州皆稱明決時值歲歉捐貲賑濟全活尤多賢丰姿挺秀自律甚嚴而待人和霽尙義好施親族賴之

楊文奎隆德人以貲補國子生授靈邱知縣有幹才持正不阿縣故有虎爲民害文奎齋沐禱祀三日虎竟死太白山有礦迹中官欲奏開之文奎以爲擾民堅執不可事得已近山多盜時出寇掠文奎牒知選壯士二百人躬環甲胄率二子往討之斬首五十餘級賊遂平陞衢州府同知

李 迪隆德貢生除房縣主簿居官務以善導人不喜刑名時縣以爭田訟者七十餘家迪歎息曰是關風化非刑獄所能止也乃期曰引諸訟者集列庭中爲之陳遜讓敦睦之義往反開曉辭氣懇惻於是訟者感愧各願罷去無復以田爲言者迪治理率多類

此及去民思其德爲立祠

江 渤字漢海靜甯人性鯁介慎名節謙退自矢萬曆二十一年
選貢除知山西芮城縣時縣有陋規新令赴任送途費三百金渤
揮去曰此民脂膏耳何玷吾官箴爲解組日囊橐蕭然歸里杜門
手不釋卷獨居衣冠危坐聞官司過門輒起立古冥行君子也
王大才字志先靜甯人萬曆閒貢生初授四川大足知縣丁憂起
復補彭山擢遷漢州有惠政民繪像立祠尋陞雲南曲靖府同知
雅意林泉毅然回籍築室家園讀書不輟時兼染翰筆法一遵古
人課諸子爲文主於莊麗子琪琪瓊俱相繼顯有名當世孫延齡
連 捷字金門平涼人工舉子業輒冠儕輩久著名諸生閒舉天
啟元年鄉試爲人寬和尤敦友讓與弟芳同居終身無閒言素好
靜不與人競未嘗見有睚眦之怨鄉曲皆稱之

甘肅新通志

卷六十六

人物志 羣材一

六十八

鄭純臣莊浪增生膽智過人崇禎六年巨寇臨城臣贊畫邑長預
設方略爲士庶倡協力守禦邑賴保全建修文昌閣經營鳩工皆
其力也

王 琪字公甫大才子也少穎達好古博學家世藏書數萬卷爲
文有體詩亦入格善書法與弟瓊齊名而行誼素孚於人以副榜
入貢

王 瓊字藍璧琪弟明末進士授山西孝義知縣遷黃梅令除其
錮害梅民立碑志德歷陞湖廣武昌僉事道時闖獻猖獗江漢震
驚瓊調兵駐防分守衝要設伏誘擊擒殺頗多而賊衆益集攻陷
楚城瓊叩左良玉軍門號泣請師隨環甲督陣直抵鄂渚斬賊萬
計不旬日而武黃漢三郡州縣皆復如故尋陞參政卒年七十七
劉克勤莊浪人以歲貢授河南蘭封簿初涖任黃河隄決淹沒數

千里勤相土宜鑿地八十里直其水勢迄今邑無隄決之患蘭封人祠焉隨以治河有功陞山西廣昌知縣

柳捷芳莊浪人以歲貢授山西徐溝知縣在任聞獄中冤聲左右曰尹秀才以強姦繼母坐辟閱前卷硬証者鄰右屠子也不令尹知鞫時使人伺之得屠私通狀母隨縊死屠斃杖尹得直焉柳承厚莊浪人以歲貢授四川什邡知縣當闖逆新破之後極力爲民請命綱徭機站各減十之七詢一時烈女義夫得二十餘人申請旌卹

李敏盛字天成莊浪人弱冠以葩經舉於鄉尋改麟經極博學禮讓甲申以還高隱秦川之仙人巖辟穀方外不喜姓字落人間當世士大夫多慕其名親式廬焉知縣王鍾鳴延修邑志

國朝陳 典字五典平涼人少讀書警敏能見大義文章力追史漢不

甘肅新通志

卷六十六

人物志 羣材一

六十九

落尋常蹊徑爲博士弟子員表表諸生間尤有至性執親之喪卧苦食蔬終三年如一日

胡廷佐平涼人居鄉敦厚能周人急難事由選拔厯官淮徐兵備道時淮徐府縣兩庠以拖欠錢糧被黜者七十餘人廷佐出貲代償之悉復其名兩庠爲立頌德碑

趙蓉鏡字晴湖平涼人忠節青藜之子咸豐辛酉拔貢 朝考以小京官用籤分刑部厯官主事員外郎郎中奏派充吉林理刑司部員差滿再留任聽斷明允無枉無縱平反冤獄聲稱藉甚駸駸嚮用尋以疾卒鄉人之宦京師者爲購地彰義門外葬焉

劉俊升字峒鶴劉連升字月三平涼人兄弟也俊升同治初舉孝廉方正 朝考以知縣用厯官直隸博野懷柔保定平谷三河等縣知縣所至有聲子瑞年官陝西知縣連升庠生善篆書喜談兵

回亂作投筆從戎征新疆北路數立功官至榆林鎮總兵
郭建本平涼監生官陝西鳳翔知縣在任數載多善政民感戴之
爲立生祠

尹廷弼王志仁皆平涼人廷弼性嚴正事有不可卽毅然不爲人
有不善輒正色詰責不少貸年三十喪偶不再娶後官文縣訓導
志仁沈默寡欲經史百家九流雜技無不耽玩有以非禮干者輒
笑謝不與校亦不對人白謂白之是重吾不德也家貧治圃鬻蔬
以自給年七十餘卒

王 悅靜甯人康熙甲午科武舉以軍功特進 御前侍衛授山
西蒲州營副將署太原鎮總兵慷慨有方略治兵尤嚴整晚年續
修家譜好善樂施州人咸稱之

李仿梧字華陽靜甯人以舉人大挑知縣分發河南官寶豐縣公

甘肅新通志

卷六十六

人物志 羣材一

七十

明果斷遇事剖決如流政聲丕著及致仕歸所載惟圖書琴畫著
書見藝文目錄子茂副貢

王 瓚字特珍靜甯人乾隆十三年貢生選授宜川訓導涖任倡
修 文廟品端學優士林翕服年老告歸好學不倦舉鄉飲大賓
卒年八十三子五運泰開泰幸泰世泰均入庠立泰庚午舉人
江自嵐字騰伯靜甯人乾隆庚午舉人揀選知縣大挑授中部司
訓性醞樸好學不倦善書工詩教誨後學多所成就
王立泰字感通靜甯人乾隆庚午武舉品行端方有學識甲辰回
匪亂佐官吏守城勤勞獨著事平闔學爲舉鄉飲大賓

王 藤字桃山靜甯人乾隆乙酉舉人賦性嚴正制行端方主講
本邑書院文以清真雅正爲宗凡邑中登科第者多出其門下當
時稱爲文宗又精醫術診治立驗有患邪崇者藤至其家不藥而

愈以訓徒卒於家

孔登元字連三靜甯人性純孝家貧爲人牧乾隆五十年充甘肅督標左營散兵膂力絕倫聲如雷吼身經百戰不少挫賊聞聲卽退故有孔哮虎之名嘉慶元年川楚教匪竄陝登元隨固原提督柯藩防勦擢把總時總督屯陝安以登元戰功最著予以二千五百人保千總三年興安告急登元馳救解圍四年救安康圍亦解五年總督那彥成履任賊由陝入甘登元奉札擊卻之六年賊入階州調登元防堵以功委永安營守備署鹽茶千總十六年派勦河南教匪所至皆捷補河州右營守備二十三年致仕歸卒年八十五

靳能起字子奮靜甯人乾隆乙卯舉人歷官成縣教諭河州學正慶陽府教授訓迪有方從學者衆擢福建永春州知州卒於任

甘肅新通志

卷六十六

人物志 羣材一

七十一

劉曰萃字正占靜甯人嘉慶庚申副貢器識高邁學問亦博教子姪得燕山遺意工書能詩著書見藝文目錄

江履生王桐皆靜甯人履生字元吉由貢生選授漢中府訓導兼署教授學品俱優本州舉鄉飲大賓者三桐嘉慶二十三年副貢性廉樸與世無爭

張仿渠字南圃靜甯人年十四入庠嘉慶戊辰 恩科舉人選陝西華陰訓導涖官三年以親老告歸左右就養能得歡心爲義學師成材頗衆子佩琳庠生

馬 祺字壽民靜甯人由歲貢官秦安訓導性嚴正學問淵博事親至孝與人以誠鄉里中咸敬憚之及居官與諸生講明體適用之學尤嚴義利之辨諸生有行止失檢者祺輒竟日訓誨不少貸及門多所成就涖任四載後告歸卒於里秦人祀名宦

葉 桂字薊林靜甯人由拔貢中式道光辛巳舉人壬午成進士
選庶吉士改官山西和順知縣丁母憂服闋選授湖南甯遠縣以
軍功擢知道州州四眼橋民獷悍匪類叢聚桂嚴拏重懲宵小遠
遁永明山場民苗爭地互相殺傷大吏檄桂同知府游擊查辦桂
率僕役數人先行抵境揮役去獨上山呼其渠諭以國法懾以重
罪渠震懼願息爭各安業桂乃真首惡數人於法脅從皆省釋收
錢糧革舞弊差役民踴躍輸將痛繩訟師平反冤獄修書院益膏
火先行後文士風丕變引疾歸教子姪讀篤宗族濟貧乏生平工
隸書得者珍藏之卒年五十有三子樹楨拔貢生孫增慶由拔貢
知縣升授直隸易州曾孫祖修光緒乙未進士官山西知縣
王汝舟字夢弼靜甯人道光辛巳 恩科舉人性孝友以詩書啟
後歷主亦樂阮陵書院講席訓迪生徒以品學爲重歷環縣奇臺

甘肅新通志

卷六十六

人物志 羣材一

七十一

等縣訓導邊域文風以振諸生敬服尋截取知縣以疾告歸卒於
家年六十有八子三庶康官徽縣教諭庶熙官四川懋功屯政廳
庶常入庠

李崇實字輝之靜甯水洛鎮人家貧好學嘗肄業關中書院十二
載未嘗旋里尋領道光辛卯鄉薦設帳鄉塾成就生徒極衆

王 鎮字穎齋靜甯水洛鎮人博學多藝尤工古文鄉試三薦不
售遂放浪江湖偕豪俠遊以自娛文名彌著學使孫某嘗給以明
經選俊匾額終道光丁酉貢生

王欽材字梓峯靜甯貢生性嗜酒醉後善爲詩杜門授徒成就甚
多

胡曜鱗字化伯靜甯朱清寨人道光中貢生入庠後家貧甚訓蒙
自給持身端正文亦清真有周濟者必拒之邑進士趙貢玉慕其

行誼許爲人師舉鄉飲大賓年屆八秩選訓導未赴官卒
周輔榮字華亭靜甯從政里人道光中歲貢生品端學純文尚清
眞每試輒冠軍後習岐黃論證悉本方書三膺鄉飲大賓人羨稱
之

趙貢玉字寶臣靜甯人道光己亥舉人咸豐癸丑成進士授刑部
主事尚書趙光深器之尋主江南司稿軍興奉 旨幫辦團練卒
於趙州旅次貢玉才學知名當時與皋蘭吳可讀通渭牛樹梅爲
莫逆交遂訂姻好工書善詩遭逢世難其忠愛之忱一寓之於歌
詠樹梅爲梓於蜀曰吳山遺稿行世

王連珍字席鑣靜甯人家甚貧好讀書甫弱冠卽入庠食廩餼道
光丙午歲貢生就教職工舉業精數學主亦樂書院講席歷任州
牧皆禮重之門下入庠登科者甚衆性謹慎事親能竭力生平不

甘肅新通志

卷六十六

人物志 羣材一

七十三

殺生蔬食而已子源瀚孫曜南皆進士

朱光前字子瞻靜甯從政里人家貧好學爲大姓授徒遂入庠軍
興避入城仍勤學不輟後爲義學師生徒益衆多所成就卒年八
十有一子樹桂庠生

馬鎮瀛字海峯祺之曾孫由歲貢歷官靈臺教諭渭源訓導靈渭
兩邑自經兵燹民鮮知讀書鎮瀛至加意興學由是文風漸振士
林遍頌有子三長樹勳廩貢生有孝行孫元春丁酉拔貢保教職
升用知縣

王源瀚字海門靜甯人咸豐壬子優貢光緒丙子舉人丙戌成進
士官江西知縣署南康縣振興文教課諸生親校試卷勤於聽訟
不輕用刑懲治會匪訟棍不少寬假人皆歎服告歸紳民遮道款
留製牌匾頌德政到家出餘貲分給親族性至孝事親不離左右

先由優貢選授教職以親老辭養親事畢始應會試中式官江右時御史安維峻贈聯云移孝作忠不負所學居敬行簡以臨其民蓋紀實也卒年七十一著書見藝文目錄子曜南乙未進士河南卽用知縣孫八人長歲貢次庠生

穆天護字慶一靜甯人咸豐中貢生性謙謹優於學設教里門弟子雲集幾至舍不能容入庠登科者甚衆卒後有孝直堪師之頌李倬漢字雲章靜甯水洛城人聰慧好學尤篤孝友弱冠入庠旋食餼設教里中洛城士多出其門同治初回亂奉提督雷正綰檄襄辦糧務獎六品軍功不受由歲貢官鞏昌府訓導待諸生如子弟及致仕歸士子遮道款留有流涕者子文敏光緒丁酉拔貢文占魁靜甯武生素有膽略同治二年二月逆回圍州城索取城內回民甫絕出十餘家占魁乘其不備率團勇出城斬馘擐旗賊

甘肅新通志

卷六十六

人物志 羣材一

七十四

懼夜遁

呂呈瑞靜甯高家堡人同治中貢生品正學博長於詩賦教授里中生徒挺挺多成立者

江樹蕙字薰卿靜甯人同治庚午舉於鄉性耿介不爲俗移家貧晝力耕夜讀書尋主四郡書院講席教人先品行後文藝士皆敬服總督左宗棠嘗委辦狄道河工工竣委署狄道教諭選授甯州學正分潤周急親族感德調補蘭州府教授尋卒年七十闔邑有古之遺直頌額子鑑增生

薛宗州字少軒靜甯人家貧敦品力學同治癸酉舉於鄉歷主郡縣書院講席成就多才從遊者常百餘人尋授安定縣教諭卒於官生平誘掖後進惟恐不及於寒士尤循循焉性和而與人交藹然可親初無臧否然黑白之判時見於言外愛才如命疾惡若

讐宗州有焉

孫 模字範堂靜甯貢生家居教授以敦品立行爲先成材極衆鄉人敬畏之有不善至恐爲其所知論者謂有王彥方之風

趙獻玉字琛航靜甯貢生博通經史尤工古文隴右回逆之變宿儒殆盡獻玉於水洛城西川之槐村別墅設帳講學就正者日絡繹不絕獻玉口講指畫不拘一格穆然有大儒風惜未展所學卒柳光穆字熙甫王礫字熙軒柳聚青字蔭堂皆靜甯人光穆同治癸酉拔貢幼承家訓淹貫經史應平涼道魏光燾聘主講柳湖書院礫同治癸酉 恩貢幼解音律善畫工詩壯歲遭時多艱慨然有投筆志所如不合退而設帳以詩畫自娛意態灑然終老於家聚青硯食里門游泮者歲嘗數人士林至今稱之亦以歲貢終

王 俛字南村靜甯人沈靜寡欲退讓不與人爭少時立志讀書

甘肅新通志

卷六十六

人物志 羣材一

七十五

不以家累作輟同治癸酉舉於鄉學益力時文得力前明諸大家屢上春官不第遂主阿陽書院講席注意經學尤以立品相策勵學者稱南村先生

王 俛字子俊俛兄也淡泊自守品學純正家貧耕讀爲業中光緒乙亥舉人禮闈報罷遂絕意進取主講阿陽書院門下士掇巍科者接踵從遊日衆沒世人猶述其教澤

李震尚字仰齋靜甯人光緒初歲貢勤慎積學家貧斤斤自守有一介不取之節妻李氏目盲親鄰屢以納妾勸震尚曰命也卒不允人以此多之

王雲章靜甯廩生家赤貧性耿介不因人熱茅屋數椽聊蔽風雨雖枵腹手不釋卷其表親家素封嘗助之以金堅辭不受

薛文思隆德人道光乙酉歲貢博學能文善誘不倦訓諸生品學

兼重同治十二年授碾伯縣訓導辭不赴卒年七十有八
張凌雲隆德人歲貢品學俱優鄉鄰敬服設帳授徒門下入庠食
餼者甚衆卒年七十三

柳翹才莊浪人與弟英才以孝稱奉節母數十年無閒言以選貢
授安化訓導陞福建甯洋知縣初泣任城已三破矣順治十年海
寇復犯城翹才躬率丁役巷戰立斬四十餘級城始獲安以功擢
蘇州同知署郡篆遇事明晰人服其廉能知縣王鍾鳴題曰天南
霖雨

崔家修莊浪人道光閒舉人慷慨好施遇婚葬貧乏者出貲助濟
允孚衆望咸豐中主講關中書院學者如坐春風名士多出其門
子奎瑞光緒乙亥舉人丙子進士官廣西昭平馬平等縣知縣
朱輝祖字黃山莊浪歲貢生負雋才年十四入庠博學好古無志

甘肅新通志

卷六十六

人物志 羣材一

七十六

功名高曠之懷時人比之李太白晚年以程朱性理學自勵凡書
所作夜效古人焚香告天著書見藝文目錄卒年七十餘
田秀實莊浪人讀書好武精拳技同治初至哈密人聞其名來學
者數百人軍興嘗率學徒解重圍 欽差文麟收入軍以功保千
總三年因公務進京行至嘉峪關遇流賊數百秀實單騎擊退之
歷升都司加副將銜以游擊用旋調署哈密協未任卒
楊生海莊浪人忠誠勇敢投身行伍從征金積堡西甯等處所向
有功保參將卒年六十四

李增榮莊浪武生以軍功保千總同治十一年鐵正澗圍城數日
不退時莊浪城守備空虛人皆恐懼欲稍緩賊以待援無人敢出
與賊言者增榮奮勇縋城出見賊僞與議和圍卽解城得全卒年
五十七

牛朝宗莊浪人光緒中 恩貢學問淵深設教鄉里循循善誘性
和而介有古君子風司訓張鳳瑄贈聯云言若芝蘭春風入座胸
無畛域秋月照人蓋實錄也卒年七十七

杜膺選莊浪人廩貢生性情和平不事修飾生平以誠待人人皆
敬之兵燹後文風不振膺選訓迪後學講明忠孝大義文章亦雅
有繩墨卒年五十六

謝登瀛莊浪人光緒中歲貢性廉謹敦品勵行非公事不入官署
設教里塾訓誨勲勲每逢院試入庠者多出其門卒年六十一

固原直隸州

隋田仁恭字長貴鄉賢宏子寬厚有局度舉明經襲鶉陰子拜開府
歷襄武浙陽郡公幽州總管宣帝時進爵雁門郡公隋文帝徵拜
大將軍破尉遲迴拜柱國太子太師甚親重帝幸其第極權禮賜
殊厚奉詔營廟社進爵觀國公通贈邑五千戶未幾拜右武衛大
將軍卒贈司空諡曰敬子世帥嗣

田德懋仁恭次子少以孝友著聞開皇初以父勳封平原郡公授
太子千牛備身丁父艱哀毀骨立廬於墓側負土成墳上聞而嘉
之遣侍郎元志就弔仍降璽書溫慰賜嫌二百米百石詔表其門
閭歷太子舍人義州司馬給事郎尚書別駕郎

明黃 成固原人洪武初由小旗從征徐州衛薊州真定遵化等處
有功授總旗復以大甯鄭村壩獲勝擢彭城衛右所百戶加千戶

甘肅新通志

卷六十六

人物志 羣材一

七十八

陞指揮同知既克東阿東平汶上東縣城授世襲指揮使後卒於
官子福襲職官羽林前衛孫慶襲職曾孫鐸海均接襲官固原衛
劉仲祥固原人永樂中以人才薦官江蘇無錫縣知縣抵任培植
學校勸農課蠶政績卓著當時推爲經濟之選

章 文固原人天順中舉人官山西祁縣知縣持己以廉御下以
寬好學能文政聲卓著

楊應元固原人嘉靖庚子舉人甲辰進士歷官河南開封府推官
持己謹飭文章典雅有才名著於鄉

趙性粹固原人萬曆己卯舉人官四川鹽亭縣知縣以文學膺上
考陞江南揚州府通判直隸河間府同知復行取政績擢雲南府
知府

徐州儒王家相俱固原人同登萬曆乙酉鄉榜州儒官山東邱縣

知縣著有政績家相官河南知縣積學能文勤於職事一時有徐
王二循良之譽

陳舜典固原人萬厯庚子舉人官山西知縣厯陞雁平督糧道博
學能文有碑銘傳於鄉

國朝曹志固原人父進安前明名將志克承韜略銳意戎事順治初
官游擊退捕流賊有功總督孟喬芳力薦之授固原城守副總兵
弟希同時授河州參將

董大成固原人康熙中以武童從陝西軍征潼鳳諸路賊匪轉戰
西域各回部積功授蘆塘營游擊擢定邊營副將陞涼州鎮總兵
署甘肅提督印務

田峻固原人康熙中以行伍從征噶爾丹有功厯官至陝西榆
林鎮總兵授都督同知廣西提督

甘肅新通志

卷六十六

人物志 羣材一

七十九

楊璫固原人雍正初由把總厯官甯夏鎮標前營游擊以從征
準逆敘功擢涼州鎮總兵都督僉事乾隆初授固原提督子世璋
襲職 特賞御前侍衛

吳宗茂固原人乾隆初官督標蘭州城守營參將調大同營副將
署永昌營副將涼州鎮總兵授四川重慶鎮總兵以戰功加鏗色
巴圖魯

馬彪固原人世業農一日鬻薪入城適提督出署以衝突簿鹵
被責馬箠彪受責畢問觀者曰此提督耶何由至此人曰亦行伍
耳彪曰吾以爲天人也若亦行伍彪力尙能致此退謂所親曰吾
官不至提督誓不再入此城於是西行投入伍乾隆間開拓新疆
彪積功以提督 記名因公道出固原或邀入城彪力辭後果
簡放固原提督既接篆設前提督某牌位於堂上而讌寮友於其

次彪指神牌語座客曰吾非此公不至此衆咸服其量卒 賜祭
葬諡壯節

劉起鳳固原人嘉慶中以行伍積功保都司旋以擒獲海寇累敘
功擢貴州古州鎮標游擊署參將加總兵銜

洪天喜固原人道光初以行伍官山東桃源營都司調征張格爾
有功授甯夏平羅營都司加參將銜

徐登科固原人道光初以世襲雲騎尉歷官烏魯木齊提標中軍
守備調甯夏安定堡守備靈州營守備署陝西撫標右營游擊旋
調防喀什噶爾英吉沙爾巴爾楚克城等處適奎里鐵列木莊匪
有變督兵截堵手刃強賊百餘以功陞四川梁萬營都司加參將
銜

劉 福固原武生道光初以戰功洊職都司加游擊銜經疆臣保

甘肅新通志

卷六十六

人物志 羣材一

八十

薦擢參將晉總兵授陝西定邊營副將定邊爲秦隴要塞福整頓
標汎不遺餘力至其慷慨好施憐恤貧乏定邊之民身被其澤莫
不感戴子鼎勛官守備孫玉銘官都司玉魁官游擊

李福殿固原人道光中以武童入伍善騎射拔把總推陞千總大
吏遴其材薦官都司旋以捕盜有方累擢陝西宜君營參將晉撫
標城守營副將歷保總兵勤於職事性仁厚鄉里有貧乏者必周
濟之子建喜孫玉珍均以行伍得官

王 祥固原人道光中以武生投効山東撫標善於捕盜卓有勞
績歷保游擊加副將銜

索 文固原人道光中以功歷官副將咸豐初署固原提督旋授
甘肅提督

馬 驂固原人道光閒拔貢官陝西渭南縣訓導性耿介操守廉

潔士子有過必面斥復取古人忠孝事誘掖獎勸渭人德之稱爲直諒多聞

趙德興字懋齋寄籍固原

原籍安徽合肥縣人

咸豐初髮捻之亂以武童入

伍隨征武昌得軍功同治初陝甘回亂進剿蓮花城鹽關金積堡等處提督雷正綰嘉其勇檄領精選營隊保守備光緒中移防奉天山海關鳳凰城積功擢游擊加副將銜子克敏有文名

慕寅固原人咸豐中以行伍從征湖廣江南山東直隸各省積功保參將官陝西延綏鎮右營游擊嗣以其父天禧於同治初殉難得兼襲雲騎尉世職

董寬字厚庵固原人咸豐中以行伍從征湖北江南等省保外委洊守備同治初回亂率隊進剿金積堡肉薄酣戰首功報捷歷保參將加副將銜勃勇巴圖魯借補金鎖關都司歷署涇州都司

甘肅新通志

卷六十六

人物志 羣材一

八十一

提標前營游擊西鳳營參將所至整頓營務威德並著一時推爲鷹揚上選卒於官

吳雲伍字雨舟固原人以軍功起家咸豐中調征髮捻各逆卓著戰績歷官秦安經制洛川把總神道嶺千總同治初提督雷正綰督兵駐陝招致上幕以功洊保參將加捍勇巴圖魯旋借補西安城守右營守備署宜君固原各營守備光緒十年復隨雷正綰視師奉天防禦營口山海關等處既還擢安西協營都司西安城守左營都司撫標右營游擊中營參將二十年狄河回叛領永興軍駐安定堵截保總兵加訥爾登額巴圖魯署商州營副將旋爲提督董福祥所倚任檄理甘軍營務處兼領馬步各營奉召入衛大學士榮祿以隴東上將目之二十七年隨聖駕西巡授漢中鎮總兵晉提督銜蒙賜珍品三十年以舊創舉發卒於官

江湧潮寄籍固原

原籍江甯句容縣人

同治元年由武童入皖撫標隨征髮

捻於潁州正陽關積功保千總調征陝西同州朝邑及平涼張家川蓮花城等處洊陞參將加副將銜後領馬隊剿甯夏以功擢總兵

張天佑字錫純固原人同治元年以武童投提督張俊部下爲哨官多謀善戰屢著奇功復隨提督董福祥進征木里河達坂城等處領中旗步隊所向皆捷總督左宗棠迭次保薦晉官總兵加提督銜

杜錫斌字國英固原人幼有大志喜讀孫吳書同治二年董福祥舉鄉團愛其勇略錫斌引爲臂助總督左宗棠駐平涼召與語大悅顧謂曰神光炯炯勁氣内含奇男子也檄攻金積堡親冒矢石克之進剿西甯大小峽峽極險悍逆盤踞諸將皆卻顧錫斌乃

甘肅新通志

卷六十六

人物志 羣材一

八十二

探捷徑率死士利刃長矛一鼓而奪七隘賊驚潰連破卓子山等處繼解河州城圍道員劉錦棠益信服之迭洊參將隨大軍取肅州出關天山木里河古牧地瑪納斯諸戰所向克捷積功擢總兵銳勇巴圖魯率蒙古馬隊與提督張俊治達坂城托克遜庫車拜城阿克蘇軍事晉提督加訥齊欣巴圖魯嗣以邊境肅清授喀喇沙爾營參將奏補副將卒子宗凱官硝河城千總

李廣珠寄籍固原

原籍河南人

以武功世其家始從將軍金順 將軍

多隆阿歷征髮捻諸匪於山東河南等省累克名城同治初隸提督雷正綰軍稱健將平涼白水驛之戰固原黑水鎮之捷及克金積堡玉門關諸役廣珠功居多保提督加奮勇巴圖魯授河州鎮標右營游擊擢靖遠協副將領達春馬隊巡防緝捕功尤多

李三才黃文友均寄籍固原

三才原籍河南文友原籍廣東

同治初三才隨提督

雷正綰征擒回各匪以功保參將加副將銜文友以馬兵隨正綰軍攻克金積堡以功拔把總旋克甯夏歷保守備

徐明固原人同治初以武童投提督雷正綰軍充哨長驍健善戰時以其父士育兄光被賊戕害誓滅此而朝食故每戰輒獲俘積功保守備洊游擊

張文魁固原人以武童投固標調征髮捻有功拔把總同治初隨提督雷正綰征金積堡克巴燕戎格各匪裹創力戰保千總以陝西防堵有功洊守備擢都司領固標練軍馬隊歷官後營守備化平營都司

武起鳳固原人以武童投効固標同治閒調征陝西及涇州等路各匪復隨雷正綰攻克蓮花城張家川平涼府城積功保千總以勦辦長武原竄匪陞守備洊都司歷官陝西雞頭關汎千總

甘肅新通志

卷六十六

人物志 羣材一

八十二

王國佐固原人以武童投効固標同治初隨雷正綰攻克董志原長武原等處獲俘有功保千總迭領精選營各旗隊保守備加都司銜

董福祥字星五固原王朝山陽人貌魁梧膂力過人髻齡嬉戲卽陳矛戟演戰陣讀書略識字輒棄之及長喜談兵慷慨有濟時志父世猷嘗勸以力田退而歎曰男兒志在四方安能耕鑿老乎同治初回酋馬化澂據金積堡反陷諸郡邑福祥曰避賊而生甯捍賊而死遂集鄉團馳驅環慶甯固諸路助官軍戰一時豪士如張俊等皆聽指揮已已率所部隸提督劉松山麾下揀爲董字三營每戰先驅迭克賊巢三十餘所手刃悍逆數百生擒馬化澂父子蕩平金積堡分軍屯之壬申勦西甯回下大小峽卓子山諸寨遂復西甯城癸酉河回米澱臣復叛馳往討平之光緒丙子隨道員

劉錦棠提軍出關攻克古牧地而烏魯木齊諸城轉旆而南疊克名城有一馬踏平南八城之謠總督左宗棠奇其才舉湘楚恪靖各營並西四城防務歸其節制前後積功至花翎提督頭品頂戴賞穿黃馬褂阿爾杭阿巴圖魯世襲雲騎尉丙戌授阿克蘇總兵庚寅擢喀什噶爾提督甲午加尙書銜祝 釐 召對大悅賜福壽字決拾佩玉諸品 命統甘軍衛京師乙未河湟回亂奉命往剿准專摺奏事率所部兼程進至狄道營洮河東先鋒數營乘革囊渡河殺悍賊數千盪平王家嘴賊巢爲浮橋以渡大軍自率馬隊先由下流渡河直抵三甲集大破之殺賊數千誅其梟帥乘勝過八仙口攻太子寺克之俘賊酋降其衆越日抵河鎮溝是夜嚴陣以待賊不敢犯天方曙進發南陽坡連渡大夏河直抵鳳林驛卽八方也賊膽喪倉皇跪迎乞降而撒拉逆回已奔還故

甘肅新通志

卷六十六

人物志 羣材一

八十四

巢河州城圍立解捕首逆馬永瑞馬晤眞及其二子馬復馬鎮馬如彪馬順姓王大漢周都帥老馬騏把蘇池俱誅之並誅慕福迪前後誅斬逆黨二千餘人河州定進規湟中力奪漫坪米拉三溝大小峽口復遣分統張銘新攻克哆吧上五莊水峽北大通諸要隘前後殄賊十餘萬逆酋均授首遣分統何得彪進擣侯子河喇課峽槍斃賊及墜澗死者復逾萬湟中平捷奏 聞晉太子少保加騎都尉世職調甘肅提督丁酉入 覲迭頒克食旋領武威後軍屯薊州 賜紫禁城騎馬如意綢緞銀兩並 賞穿帶膝貂褂庚子變起倉猝 聖駕西巡授隨 扈大臣節制滿漢各軍嗣天意厭兵修好隣國尋罣誤歸里甲辰省城黃水爲災出三萬金助賑戊申正月寢疾遺命以積年薪俸所贏四十萬輸之公家令子孫自食其力遂卒孫恭二品銜 記名道員

張俊字傑三固原毛居士井人性豪俠幼卽有乘風破浪之志年甫冠值同治回亂與提督董福祥於瑣尾流離之際仗義大呼招集鄉團屢挫賊銳已巳提督劉松山分統湘軍西征俊與福祥率所部往隸之編爲董字三營俊領左營首克吳忠堡繼破胡家旱八古城各賊巢生擒逆酋王洪楊朗周洪克金積堡敘功授都司守河州隨道員劉錦棠入湟中解平戎紅柳園馬營灣重圍破小峽堅壘四小峽兩山壁立稱絕險俊與福祥率敢死士襲之賊衆驚潰擒逆酋海有德癸酉河州回復叛馳往助剿戰於三十里鋪陣斬賊目進破角底臺美家集大禮拜寺不數載而平丙子出關克古牧地烏魯木齊吐魯番各城募定遠三營躡賊於庫車黑米地察爾齊烏什嘗五晝夜逐北千二百餘里擒斬無算拔出纏民十餘萬先後敘功洊保提督換花翎三易巴圖魯名號 賞穿

甘肅新通志

卷六十六

人物志 羣材一

八十五

黃馬桂已卯駐軍英吉沙爾偵知沿邊回目爲安夷教主煽誘謀叛率馬步各軍前進遇賊木吉力戰敗之窮追至里雅口巴什又敗之蹙於黑孜達坂殲焉捷奏 賞頭品頂戴給三代正一品封典己丑 特簡西甯鎮總兵調伊犁鎮信賞必罰兵強民樂甲午東事起選將賈快礮二千桿於甘軍以資用乙未擢喀什噶爾提督時河湟回變俊建援甘保新之策駐阿克蘇居中調度事平調署甘肅提督旋奉 旨陞見 賞賚有加大學士榮祿統武衛全軍以俊充翼長並領中軍訓練勤勞未幾以疾卒於軍 優旨賜卹 國史立傳諡壯勤

張果字錦亭提督俊弟也同治初以武童奮迹團伍隸董福祥部下隨剿西甯靈州金積堡大通古牧地等處擣巢俘馘積功洊提督加一品秩 特予依博德恩巴圖魯光緒初以母老乞歸大

吏器其材檄帶甯夏防軍馬隊弟毅以從征新疆有戰績保游擊加參將銜

周天才字厚庵固原人同治初以行伍隸張俊團隊旋充董字中營百長從征靈州克金積堡保千總進剿大通陞都司光緒初復隨大軍出關烏魯木齊瑪納斯達坂城諸役節次報捷擢參將加左勇巴圖魯克西四城洊總兵加芬誠也圖魯嗣以搜捕竄匪論功晉提督歷統定遠中右各營署庫車營游擊喀什噶爾提標右營游擊授英吉沙爾營參將陞回城營副將

許獻德固原人以行伍歷保總兵加提督銜同治閒領兵隊迭次攻克新疆侯犁等處卓著戰功積勞卒於軍光緒初事 聞賜卹如例弟獻鵬保游擊

吳連科字捷軒固原人同治初回亂連科奮志從戎遂隸張俊部

甘肅新通志

卷六十六

人物志 羣材一

八十六

下襄理文牘俊進剿金積堡連科相度險要決策運籌悉中機宜後轉戰河湟安肅新疆南北兩路靡役不從積功保總兵僦勇巴圖魯年甫五十卒

張銘新字錦堂固原人同治初隨提督董福祥提督張俊扶義練團以禦羣回援環縣奮身酣鬪城賴以保全光緒初從大軍出關領董軍左路營隊凡大軍屯剿處所悉出死力爲助福祥甚倚重之積功擢提督法福凌阿巴圖魯授河南南陽鎮總兵加一品秩後卒於薊州營次 賜祭葬 國史立傳錄其二子

薛成德固原人以武童於同治初入張俊伍隨剿河湟著戰績領營哨馬家灘之役論首功歷保都司光緒初隨董福祥攻克馬納斯寨里河吐魯番各要隘保副將入衛駐防京師領甘軍親軍馬隊洊提督額騰額巴圖魯加一品秩

白 寬固原人性剛勇熟於山川形勝同治初入提督董福祥營每至一境必指陳要隘俾士卒知所向故屢戰輒勝光緒中迭隨福祥馳驅關內外河湟諸戰事皆著奇功洵保總兵晉提督加揚勇巴圖魯

胡登花字筱園固原人同治八年以武童入伍充董軍左營百長克靈州有功拔把總迭次收復金積堡馬家灘小峽西甯府城陞都司繼克大通安輯回番擢游擊光緒初奉道員劉錦棠檄領董字左營保參將加雄勇巴圖魯旋解迪化城圍加副將會克吐魯番滿漢兩城洵總兵加錫林巴圖魯嗣以擊散安夷窮追陝回克烏什城疏上論績 特恩晉提督加一品秩列三等軍功奉 詔北上兵部校試弓馬冠場 賞給提督半俸領陝西練軍撫標左右中前後馬步各營隊尋以舊創觸發卒於草灘行營子二長沂

甘肅新通志

卷六十六

人物志 羣材一

八十七

官守備次瀚文生官縣丞

何有道字志齋固原人同治八年隸提督董福祥軍以驍健稱同治中河州之役與杜錫斌分道夾擊以功保都司復以攻西甯肅州有功洵參將光緒初隨大軍出關分領董字左營征天山適晝晦風沙迷目有道鳴金直前克之總督左宗棠奇其勇保副將加強勇巴圖魯擢和闐營參將領新軍馬步等營二十一年河湟復叛隨董福祥援剿敘績記名提督

何美玉固原人同治九年入提督董福祥伍以攻克河州西甯功保守備陞參將光緒初復隨大軍進剿迪化府伊犁各城迭擢總兵旋以久戰於外乞歸籌屯墾管理事若將終焉既而董福祥奉召北上適二十一年河回變檄美玉領營隊督戰美玉渡洮直擣邊家灣八方諸逆巢河州圍解加提督穆經阿巴圖魯 簡授

西甯鎮總兵二十四年奉調入衛領甘軍副中營駐防正定旋以舊傷發卒於軍次

張玉林字秀峰固原武童有會計才同治十年投提督董福祥軍進征肅州復隨大軍出關檄管安遠各營糧臺積勞洵保總兵加提督銜

張得勝固原人同治十年以武童充提督李某前哨長樸實有戰略總督左宗棠任重之肅州之役立功甚偉光緒初提督董福祥檄領右路馬步各軍紀律嚴整新疆伊犁諸戰既捷收撫回纏籌善後事征車所至秋毫無犯二十一年入關復隨提督董福祥轉戰河湟累功洵總兵加提督銜二十三年駐防薊州領甘軍副前營

柳作棟楊文鵬俱固原人同隸提督董福祥部下作棟同治中積

甘肅新通志

卷六十六

人物志 羣材一

八十八

功保都司領新疆布魯台馬隊巡緝遊匪光緒二十一年進征河州保游擊加副將銜文鵬同治中隨征烏魯木齊達坂城等處積功洵游擊署新疆瑪納斯營都司

孫得蔭劉顯才俱固原人均隸提督董福祥部下得蔭同治中隨征關外積功保守備光緒二十一年隨大軍攻克西甯米拉溝保都司加游擊銜旋入衛領甘軍親軍中旗馬隊顯才同治中積功保都司加游擊銜光緒二十一年進攻河州三甲集太子寺等處分領甘軍正後營步隊

張儒珍字雅軒提督俊子也同治季年以文童隨總督左宗棠治軍事保縣丞瑪納斯托克遜諸戰有功晉保知縣光緒間入道員劉錦棠幕保薦直隸州加知府銜隨提督董福祥勦河湟逆回積功保道員 賞戴花翎二品頂戴武能依巴圖魯軍機處存記尋

以舊傷觸發卒子超字幼升以廕生官兵部郎中

趙鳳略字曜亭固原人同治光緒間隨提督董福祥營轉戰關內外二十餘年領董字中旗馬隊道員劉錦棠嘉其勇幹歷保總兵加提督銜

董陞官字鳳墀參將寬之子也光緒初以武童入提督董福祥軍充糧喀什提標槍法準利拔把總邊防積勞擢守備二十一年河湟回亂入關募勁旅康家崖邊家灣太子寺諸役踰嶺探酋巢爲諸軍導乘夜鳴鉦前進毀敵壘獲俘奏捷屢洊總兵加提督銜喀勒春巴圖魯入衛領甘軍正左營三十年陝西巡撫曹鴻勳檄領陝西防軍駐耀州卒於軍

喬兆福字錫五固原人光緒初入提督董福祥營洊都司二十一年征西甯保參將加副將銜芬誠巴圖魯入衛領甘軍副前營

甘肅新通志

卷六十六

人物志 羣材一

八十九

南化行字二齋固原人光緒乙酉拔貢鄉試累薦不售以教職注選奉牒辦本州善後事具有條理以清白見稱又倡修書院稟請以存款發商生息刊石垂後故公款得以永存士林賴之晚年連得二子人以爲賢勞之報云

王大綬固原廩生篤志好學守正不阿文藝亦冠冕一州光緒十九年二月丁祭適天雨雪衆官俱越禮跪拜堂上大綬時爲引贊據拜下禮文阻之弗聽翌日具稟州牧請通詳上官申明體制當事者再四排解大綬言事君能致其身今區區衣冠尙且吝惜况致身乎爭執愈力州牧壓稟不詳大綬氣忿自盡其妻亦投繯殉之

蘇家良字翰臣硝河城回民性剛直貌雄偉同治初回亂家良隨征關内外迭克狄道渭源華亭西和張家川巴燕戎格諸城當時

以驍將稱大吏疊薦 記名提督加法什尙阿巴圖魯 賞穿黃馬褂歷官肅州鎮標中營游擊加一品封典弟家林字傳臣同治初從征河州西甯勇往善戰家榮字屏臣助家良治軍事均以功保花翎副將

蘇進智硝河城回民同治初回亂嘗出粟以賑飢民投提督曹克忠部下嘗遇賊白草塬奮勇前敵斬賊七十餘級身被數十創不稍退歷保花翎副將肅清後籌辦善後勸設義塾功尤多光緒乙未河湟復亂硝河城漢回驚恐互有畏忌進智遣子玉珍集靜隆固海紳民排解得無事大吏重之以額式其門

蘇 灝平遠韋州人光緒二十一年五月河回攻破豫望城逼近縣城灝率團勇百餘名駐縣防堵賊匪遠遁城賴以全後有撒拉回新教馬登海欲來韋州傳教灝力拒之

甘肅新通志

卷六十六

人物志 羣材一

九十

王益萬平遠人儘先參將光緒二十一年逆匪李萬庚馬福楊保山等率衆攻城益萬誘擒之賊衆悉潰後積勞病故

張鵬舉字霞軒海城人咸豐辛酉拔貢同治初回變鵬舉避亂山中讀書不輟癸酉舉於鄉甲戌成進士歷官湖北南漳應城縣知縣興學校戢強暴所至有聲後告歸以孝友勸子弟耕讀相傳鄉人稱之孫世清歲貢

康且亨字嘉會海城歲貢世居南岔堡有氣節膽略過人里有爭訟者得且亨一言輒解同治初回亂且亨練團守危堡外乏援兵歷八年卒無恙有回酋張某以悍聞稔堡饒富選悍賊數千騎圍攻連年不下賊稍懈堡民出樵多被擄賊佯言如康某來當縱若去且亨聞卽縋城下入賊壘請釋諸被擒者賊許之因責賊以大義賊怒刺其股血流且亨皆裂手指罵不絕口賊囚之後且亨脫

身歸賊亦解去值歲饑且亨籌賑貸族衆資以生亂平清丈地畝率多厚斂且亨稟白當路額減半年約省鉅萬金邑人德之年七十沒於里著書見藝文目錄子嗣縉官陝西直隸州

楊鳳鳴字梧岡海城歲貢光緒乙未回匪戕官劫獄陷城豫望城亦失固屬七營鎮同被焚掠時固原提督雷正綰被圍河州固標有帶隊參將游擊二員擁兵自衛不敢出城擊賊及出城僅日行三四里或十餘里逗遛不前遂致回逆猖獗鄉村多罹慘禍知州匡翼之電請陝隊援勦固城賴以保全事平鳳鳴以參游二員貽誤軍機幾致固城不守乃竟濫邀保階不顧情理上稟當路袒參游欲寬鳳鳴於法提督董福祥廉得其情致書當路於是參游始被議開缺而鳳鳴亦褫去衣頂鳳鳴平居設帳課徒多成就足跡不入公門及臨事守正不阿人咸義之

馬彥春海城回民副將銜篤勇巴圖魯署馬營監游擊光緒乙未逆回李昌法叛彥春誘殺之民賴以安

化平直隸廳

明高義柱化平川人家素裕年三十無子夜夢乃父示之曰爾欲有子非散財積德不可義柱於是重義信好施子凡鄉鄰婚嫁喪葬無力者必量力助之村人李喜因無幣禮婚幾悔義柱給資成全之王自順以屠殺爲業給資令別謀生計鄉里稱爲善人後舉五子皆孝友義柱年七十三而終

國朝劉全孝化平聖女里回民好讀書杜門不出每與子弟講論歷代名臣義士孝子節婦子弟恪遵教訓不敢少逾五世同居閨門之內整齊嚴肅全孝年九十三而終鄉里慕其德範建坊表揚

金文同字叔馨皋蘭人由優貢中副榜光緒己卯舉於鄉庚辰成進士授戶部主事歷升員外郎郎中同治初河回變亂直犯省城川北鎮總兵鶴齡率師赴援糧盡不前文同謁軍門陳大義並捐粟米饟之三軍感奮破賊城賴以全邑有興文社久而漸廢文同倡議整頓請大府撥叛產爲膏火貲人文益盛四川總理鹽務某侵公款八十餘萬欲以賄免文同不爲動卒議賠 召見時諭以在部聲名甚好蓋將欲大用也拳匪之亂扈從 西巡授興安府知府興安號稱難治文同寬猛相濟政聲卓然屬邑民教相仇匪徒乘機煽亂文同處以鎮靜陰使人解散之時以爲有濟變才權三河口鹽釐值河南閩鄉縣民爭引岸牽涉陝西兩省大吏齟齬文同援案詳陳引卒歸陝商民稱便調署漢中如治興安新政舉行而民不擾卒於任所囊橐蕭然

補輯

